


5237.8/7922(1)  
C12

近代詩鈔

一







逆鈔

代詩

行





近代詩鈔叙

有清二百餘載以高位主持詩教者在康熙曰王文簡在乾隆曰沈文愨在道光咸豐則祁文端曾文正也文簡標舉神韻神韻未足以盡風雅之正變風則綠衣燕燕諸篇雅則楊柳依依雨雪霏霏穆如清風諸章句耳文愨言詩必曰溫柔敦厚溫柔敦厚孔子之言也然孔子刪詩相鼠鶉奔北門北山繁霜谷風大東雨無正何人斯以迄民勞板蕩瞻卬召旻遽數不能終其物亦不盡溫柔敦厚而皆勿刪故孔子又曰詩之失愚其爲人也溫柔敦厚而不愚則深於詩者也故言非一端已也文端學有根柢與程春海侍郎爲杜爲韓爲蘇黃輔以曾文正何子貞鄭子尹莫子偲之倫而後學人之言與詩人之言合而恣其所詣於是貌爲漢魏六朝盛唐者夫人而覺其面目性情之過於



相類無以別其爲若人之言也夫文簡文慤生際承平宜其詩之爲正風正雅顧其才力爲正風則有餘爲正雅則有不足文端文正時喪亂云撫迄於今變故相尋而未有屆其去小雅廢而詩亡也不遠矣昔孔子作春秋張三世所見異辭所聞異辭所傳聞異辭據哀兼及昭定己與父時事爲所見之世文宣成襄王父時事謂之所聞之世隱桓莊閔僖曾祖高祖時事謂之所傳聞之世今竊本此意論次有清一代之詩文簡以下傳聞之世也文慤以下所聞之世也文端文正以降所見之世也所聞所傳聞先進略已論次而身丁變雅變風以迨於將廢將亡上下數十年閒亦近代文獻得失之林乎雖位卑身隱不敢比文簡之有感舊文慤之有別裁然以數十年見聞所及錄其尤雅者都爲一集視吾家迦陵之篋衍放而大之其諸世之君子

或亦有樂乎此也歲在上章協洽且月古侯官陳衍書



凡例

一是鈔時代斷自咸豐初年生存之人爲鄙人所及見者  
一是鈔無論已刻未刻之詩但就見聞所及甄錄之其未見者姑從闕如

一是鈔無卷數仿宋詩鈔元詩選例人各爲卷其先後之次序編一總目有科第者次以科第無則略準其師友之輩行次焉

一是鈔擬古不鈔壽詩不鈔詠物詩少鈔長慶體少鈔柏梁體少鈔長短句者少鈔

一各姓名下載字號爵里集名外閒綴詩話仿明詩綜湖海詩傳之例偶摘斷句並略附評品焉

一各家中科第官職或漏或誤時所不免一時無從查問閱



者諒之

近代詩鈔總目錄

第一冊

祁騫藻 陳偕燦 梅曾亮 莫友芝 苗夔 邵懿辰  
陳慶鏞 溫訓 左宗棠 符兆綸 顧淳慶 姚燮  
姚椿 朱琦 魯一同

第二冊

何紹基 徐榮 鄭珍 江忠源 孔憲彝 葉名澧

第三冊

曾國藩 林昌彝 汪士鐸 龍啟瑞 王錫振 魏源  
王柏心 林壽圖 龍汝霖 周壽昌 郭嵩燾

第四冊

劉蓉 羅澤南 徐樹銘 李鴻章 黃彭年 朱次琦



吳贊誠 夏獻雲 戴鈞衡 孫廷璋 陳澧 劉存仁  
尹耕雲 楊彝珍 孫衣言 俞樾 周星譽 周星詒  
第五册

徐子苓 王尙辰 戴家麟 楊峴 鄧輔綸 張裕釗  
張洵 潘祖蔭 鄭守廉 許宗衡 薛時雨 王闔運  
第六册

翁同龢 李壽蓉 陳壽祺 易佩紳 高心夔 王星誠  
李文田 龔易圖 彭玉麟 劉銘傳 丁日昌 曾紀澤  
張錫鑾 羅志讓 吳允徠 施山  
第七册

江湜 金和 周長庚  
第八册

張之洞 王先謙 吳汝綸 譚獻 孫詒讓 陳寶琛  
第九册

寶廷 潘鴻 陳豪 吳觀禮 瞿鴻禨 張佩綸  
程頌藩 葉大莊 劉大受 黃遵憲 王秉恩 鐵齡  
譚宗浚 張百熙 黃嗣東 張景祁 王舟瑤  
第十册

陳書 陳豫 黃燦 林葵 易順鼎  
第十一册  
繆荃孫 陳琇瑩 楊銳 謝章铤 王仁堪 楊文瑩  
樊增祥 盛昱 王仁東 林曷 顧印愚 李慈銘  
袁昶

第十二册



沈曾植 黃紹箕 梁鼎芬 左紹佐 于式枚 陳與罔  
郭曾忻 志 銳

第十三册

鄭孝胥 顧 雲 林 紆 唐 晏 朱銘盤 康 詠  
李宗言 李宗禕 高鍾泉 陳 遷

第十四册

朱祖謀 蒯光典 張亨嘉 柯逢時 段朝端 金武祥  
吳俊卿 沈汝瑾 勒深之 馬貞榆 周家祿 葛道殷  
簡朝亮 金 石 夏煒如 趙光榮 關 棠 沈瑜慶  
陳 瀏 王允哲 林崧祚

第十五册

馮 煦 陳三立 吳慶坻 余肇康 沈曾桐 王樹枏

宋育仁 秦樹聲 葉在琦

第十六册

張元奇 周樹模 李葆恂 嚴 復 王壽昌 江 瀚  
程頌萬 丁惠康 吳保初 潘飛聲 李 詳 梁 莢  
范當世

第十七册

姚永概 王毓菁 鄭祖庚 費念慈 徐仁鑄 江 標  
曾廣鈞 顧 瑗 楊鍾羲 方爾咸 沈宗畸 力 鈞  
陳元凱 沈翊清 梁啟超 徐 珂 陳 詩 狄葆賢  
王國維 邵曾鑑 吳鼎雲

第十八册

文廷式 王以愨 趙 熙 王乃徵 江雲龍 曾習經



鄭錫光 黃紹第 陳懋鼎 劉光第 楊深秀 俞明震

第十九册

王景 高向瀛 吳學廉 鄭孝樞 吳用威 姚鵬圖  
吳士鑑 許貞幹 何藻翔 屠寄 李希聖 張謇  
李瑞清 陳銳 徐乃昌 陳澹然 王景沂 麥孟華  
譚嗣同 林旭 卓揆 周行原 鄭沅 陶邵學  
黃鳳岐 孫雄 曹元忠 歐陽述 蕭延平

第二十册

夏敬觀 冒廣生 李宣龔 康有為 卓孝復 胡思敬  
林開謩 傅增湘 章華 羅惇融 鄧鎔 汪榮寶  
三多

第二十一册

何振岱 鄭容 壽富 袁勵準 楊增榮 王式通  
鄧實 鄧方 沈贊清 曾毓瑜 桂念祖 傅嶽棻  
林翰 陳敬 董子良 張葆達 謝鳳孫 周從煊  
徐思允 胡琳章 林思進 向楚 潘博 黃孝覺

第二十二册

陳曾壽 郭則澧 李世由 諸宗元 梁鴻志 袁思亮  
閔爾昌 丁傳靖 何震彝 陳士芑 林蒼 路朝鑾  
曹經沅 黃式蘇 王賡 林長民 劉道鏗 黃懋謙  
江庸 林志鈞 羅惇旻 黃節 曾念聖 林棨  
王樹榮 姚德鳳 陳延韓 劉詒慎 范罕 李佳

第二十三册

金天羽 顧燮光 陳止 陳衡恪 陳方恪 胡朝梁



侯毅 汪國垣 江古懷 周達 奚侗 程康  
謝無量 馬浮 程炎震 周貞亮 賀良樸 向迪琮  
張朝墉 成多祿 黃維翰 陳樵 蘇南 林黻楨  
章廷華 謝鼎鎔 黃履思 龔乾義 朱聯沅 沈復

第二十四册

黃溶 楊毓瓚 李宣倜 王倬 張同書 李景埜  
卓定謀 朱奇 莊羲 朱羲胄 陳鳴則 鄭璆  
林宗澤 林葆炘 陳炘侯 陳元璋 劉朝敘 賴籌  
趙尊嶽 林景行 林學衡 郭則壽 鄭乃奇 王我臧  
陳聲暨 沈觀冕 吳鐸 張宗楊

近代詩鈔

祁寯藻

寯藻字叔穎一字淳甫避諱甫改號春圃山西壽陽人嘉

慶甲戌進士官至體仁閣大學士謚文端有繆劬亭集

石遺室詩話有清一代詩宗杜韓者嘉道以前推一錢

蔣石侍郎嘉道以來則程春海侍郎祁春圃相國而何

子貞編修鄭子尹大令皆出程侍郎之門益以莫子偲

大令曾滌生相國諸公率以開元天寶元和元祐諸大

家爲職志不規規於王文簡之標舉神韻沈文愨之主

持溫柔敦厚蓋合學人詩人之詩二而一之也余生也

晚不及見春海侍郎而春圃相國諸公皆耆壽俊至咸

同閒猶存故鈔近代詩自春圃相國始



青槐吟社晚坐

宛宛朱藤倚綠槐涼雲深護小窗開  
花垣恰有玲瓏意放過斜陽一道來

舍後丁香初開

三年不見此花開每爲離愁減酒杯  
深院無人春易盡故園今日客歸來  
枝橫仄徑消殘雪影動低牆鎖舊苔  
最是如醒如醉態一回相賞一徘徊

北寺題壁

孤寺鐘聲起暮煙紅牆一道綠陰圓  
舊游忽記題詩處花落苔深又十年

山村夜雨

山村寂歷夜深清夢醒涼雲枕簟生  
三百人家燈火裏一時齊

聽灑窗聲

題沈石田韓襄毅園林畫冊

儒將風流在官清俗事無小園一二畝  
垂柳兩三株妙解觀魚樂閒描戲鴨圖  
平生氣飛動餘夢落江湖初月隱高樹  
虛窗留晚煙秋風下紅葉落我酒杯前  
積水涼生地行雲影在天舉頭一相問  
萬籟正蕭然百尺青槐聳枝枝密影交  
路從何處轉門向此中敲掃石身將  
隱投壺技未拋主人愛嘉樹烏鵲亦爭  
巢家住藕絲鄉花香雜水香結茅臨淺  
渚移柳過低牆波動雲痕活林深雨氣  
涼賣魚羞入市何用釣竿長

秋夜酌客

夜深簾影捲秋波話到鄉關感慨多  
爛醉狂吟猶不足相看無



奈月斜何

題鄭雲麓同年

開禧

荆庭聚慶圖用東坡馬上寄子由詩

韻

荆花織門紅突兀春來競向龍溪發燕臺南望六千里青山笑  
人何落寞瓦屋三閒風雨隔輭塵竟日車輪沒竭來天寒翠袖  
薄夢踏綠蘿菴下月雁行憶爾兄弟樂促膝如聞話酸惻朱闌  
白石幾年別池草園禽境超忽客遊鴻爪感今昔絃柱何勞歌  
錦瑟請看一幅對牀人不羨中朝台鼎職

題黃在軒水部雪後園林畫卷

蕭騷一夜響庭柯曉起頻將凍筆呵卻憶窰臺衝雪地今年寒  
較去年多

掃徑扶筇有底忙聳肩拄頰看山光似聞嚇嚇田公笑隔歲先

誇餅餌香

肩輿道覆夷于右臂作此自遣

任邱縣

輿夫本是鉏田夫強使扛輿舍其鉏棄長用短計已左兼之道  
弗多泥塗前肩欲進後肩掣後者崛起前趨起兩轅雙杵日掀  
簸危坐兀若枯僧枯一朝步窘肩亦脫夫仆輿覆誰爲扶倉卒  
便令柳生肘逍遙安得尻爲車我謂輿夫爾何愚不鉏爾田扛  
我輿輿夫答言爲役驅新麥登場不及儲官錢傭夫肥吏胥枵  
腹乃使充公徒我聞此言三歎吁臂痛若失心轉紆高牙大纛  
左右趨當官豈念民艱劬嗚呼當官豈念民艱劬

入桐城界度嶺

朝行山之阿盤旋千坡陀白云已出山不知山更多山北路幽  
折足繭肩相摩山南豁開朗萬點堆青螺羣山亦好勝陵跨森



包羅緩步舍行輿直上登嵯峨是時日亭午照耀澗與邁山條  
擢翠巘水葉拳素波因巖草爲厖倚竹雲成窠忽聞泉石聲乃  
是松風過蕭然衣袂冷靜若琴箏和誰家好園亭短牆圍修柯  
參差見鱗瓦高下帶女蘿徑思斂柴扃山深愁路訛僮僕促我  
行欲去仍婆娑夕陽下平麓殘沙明斷河清景不可失過眼如  
飛梭冥想苦搜索山靈當見訶

潛山道中十首

澗水喧豗勢不平出山便解與山爭林林掉臂穿雲去讓爾中  
流自在行

瀦水南方勝北方但逢隙地便開塘山田犖确成何用亂插青  
松當插秧

青山缺處樹彌縫水外人家綠幾重白鳥一羣棲不定恰疑春

雪下長松

望廬山

我出黃梅六十里隔江已見江西山人言此是廬山背熨眼頓  
覺超塵寰屏風幾疊照江水夕陽萬皺明爛斑不知香爐瀑布  
在何處但見側峰橫嶺高下雲迴環雲中五老似回首一一闖  
露青髻鬢有如蒲阪道中看太華三峯飛影過潼關黃河曲折  
走關下亦如大江橫鎖潯陽閒山川靈祕造物惜每爲好事破  
其慳我昔西游今南涉勝境兩遇非偶然書生行勝苦不辦況  
騎驛馬囊官錢游山如此亦大好只惜過眼空雲煙買田築室  
吾不願但願歸途住此三日窮躋攀

渡潯陽江

五嶽我甫遊其一四瀆我已涉其三彭城渡河曾幾時淮水鐘



鼓聞鏘鏘邇來山行又十日屢乘竹筏過沙潭坐看萬峯走波浪蓄勢一瀉無停涵不有長江鎖疊嶂幾如奔馬難回驂聞道潯陽有九派北人到此心未諳但喜天晴風力便檣梢燕子聲呢喃須臾忽失岸西塔宛轉似避中流酣匡廬作屏江作鏡上下照耀天青藍偶然雲陰落遠水祇訝日影搖晴嵐蒼茫不辨洲上樹迤邐漸近沙頭龕卻從下流溯而上參差樓閣臨城南片帆安穩神所勞奇境紆折吾尤貪此邦天險扼吳楚鑠鑰未許輕窺探江州司馬古循吏淪落豈爲詩情耽高亭斜日望寥廓江水東下波如泔

東林寺

言尋虎谿水一訪東林寺門前幾株松已有高人致坐我三笑堂虛窗落山翠慧遠與陶陸屏間圖繪具似聞撫掌語衣帶皆

笑意想見山中人方外結同契叔夜龍鳳姿引領但遙企堂後

瞻遺像彌勒龕同侍蓮社十八賢一一鬚眉備石碣尙唐文北李

海碑元時重刻鐵釜猶宋字宋政和四年鑄大可容一石當時盛檀施老僧

今苦飢種蓮幾無地指說屋後泉卓錫著靈異遇旱水不涸煎茶味堪試吾云宜釀酒飲事有成例在昔清淨禪獨許淵明醉合掌白遠公拈花若微笑過前谿虎嘯行將至

七月二十日度梅嶺

憶昔懸車西度隴天寒木落山荒茸十年清夢寄梅花鸚鵡喚人雪毛氄竭從嶺北走嶺南親踏梅根訪梅種梅家臺候老不死骨作青山花作冢讀以梅名九磴螺盤鬼斧開萬峯虎踞神倉

輦南康記大庚嶺形似廩行商負戴連尻睢爭道攀緣接頂踵炎洲氣候

一嶺隔鑠鑰咽喉百蠻重挂角寺高雲易封曲江功大人思奉



寺有張當年峻坂闢南荒此日煙嵐爭北拱題石惜無舊跡留

補梅喜見穹碑聳嶺少古梅今存者多乾隆時請看夾道三百

株瘦幹欹斜漸擁腫僧云此山花特早十月梢頭暗香湧攜來  
嶺外萬戶春歸向尊前一枝捧祇恐老梅厭送客冰肌未許貂  
裘擁蓮龕彌勒笑拈花吾願不奢神其寵

雨中舟宿峽山寺下晨謁曠公

山水亦何奇奇觀乃在峽一水劃地開兩山逼天插彎環三十  
里勢若劍入匣昨來乘秋漲晴日風帆押直陟北禺巔腰脚頑  
不怯舟人畏風雨鳴鏜苦迫脅歸舟及峽口風雨儼相狎破浪  
決獨往尋山盟早畝白雨不到地橫風溼衣恰仰首衆峰低黑  
雲天四壓夜深抵寺門石路滑且狹巖花香閉窗嶺樹響搖筵  
凌晨謁吾師迎笑何款洽乃知峽山奇領略真無乏陰晴互變

幻神靈巧噴欲我有兩篇詩持贈三乘法他日請相念萬里寒  
江硤

題煦齋夫子惜驄馬圖

九門鑠鑰一夜開金吾將軍騎馬來馬前緹騎擁大戟闐城溢  
郭歡如雷明日都人爭動色報道將軍已擒賊將軍神勇人不  
知但見驟耳隨風馳風馳電掃無留盼蹴踏紅塵來白澗來時  
行殿午陰斜卻到都門未哺飯將軍報主不愛身馬亦宛轉從  
將軍草中狐兔復何有天上騏驎自不羣當時畫圖撫駿骨鐵  
腕花鬢氣鬱勃即今玉勒擁沙隄猶想連錢錦障泥將軍功大  
心更厚念舊惜勞及奔走自是風塵物色難定知詩句流傳久  
我欲範銅寫此馬置之黃金古臺下驂騮馭裏世間多不遇孫

陽當奈何癸酉秋林清之變公以步軍統領隨扈白澗行宮



風雨宿青岡驛再送夢山

北風遞冷入青岡衣袂蕭蕭驛路長一雨有情留客住扁舟何  
事送人忙且謀曲棗連牀地況得逍遙古木堂今夜與君還共  
醉臥聞征雁去湖湘

過洞庭西湖

自笑氈氈鶴真成汜汜鳧春深小瀼水風急大溶湖

小瀼在江大溶在

安湖在

歛岸天無際驚舟夜自呼鷗夷何處逐青草斷平蕪

三月二十二日發武陵宿桃源

一曲滄浪怨楚臣萬株桃樹笑秦人屈平醒眼陶公醉任爾漁

郎獨問津

雨中講堂望南山

朝見南山雲暮見南山雨雨來山若吞雲去山若吐可憐青山

色顯晦難自主崇朝雨萬物功成名不取辰陽乃山國多石而  
少土老農嶺上歎欲假愚公斧豈知膚寸雲能潤萬礎柱我今  
與山識相喜兩無侮高人雖偃蹇意不厭官府但惜手拄頤未  
許屨出戶日長人語靜簷滴漸如縷坐令青夫容渺渺墮江浦

船溪驛館北窗下嘉木蔚然

牆東冬青西梧桐矯若角里捐黃公枇杷若榴植當中平頭矮  
脚如雙僮更有紫荊木兩叢老幹倚屋孫枝豐有杖不扶甘直  
躬此老倔彊誰與同深山古驛雲冥濛北窗終日扃清風過客  
高枕耳似聾紅雪滿地林花空時有乳燕銜殘紅我來屬客開  
簾櫳舉酒一醉琉璃鍾嗟爾佳植時不逢屈沱競渡船如龍涉

江欲采青夫容

時端陽後一日

永順試院留別諸生

近代詩鈔

祁寯藻

七



溪州古蠻荒天險連巴蜀灘聲二百里山力不能束我從辰水  
陽來沂北河曲晴天雷電走陰峽星辰浴豈不念險艱願言省  
風俗土薄稀膏腴民勞澹耆欲其士雖鮮文樸誠意自足荆山  
萬琅玕愛此不雕玉有時發光采虹氣儼上燭蠻煙雜瘴雨皓  
質終不辱往者荆榛叢槃瓠遺種續大彭蠡食之長蛇肆其毒  
茫茫千載中版圖未收錄玉屏插天青銅柱壓江綠衣服限雲  
山干戈困蠻觸嗟哉此邦人天高何處跼皇朝大底定遐邇仁  
風沃朱垠仰南耀黎峒咸內屬遂令五谿地撥雲見晴旭百年  
郡縣開萬古冠裳縟宣風慰遠人食德懷舊躅中州清淑氣磅  
礴因材篤豫章久偃蹇驂騮老局促斯理恐未然吾爲多士勗

舟下鳳灘

鳳灘灘水秋益壯一灘一丈落天上上猶牽輓下如墜前船後

船不相望我昨七月沂流來歸程豫計心惆悵溪州苦雨動經  
旬山徑陡滑穿幽曠平明解纜辭銅柱一葉飛流送千嶂雷霆  
倏發蛟龍怒滿坐無言色悽愴艣聲水聲兩不聞惟見簾窗挂  
銀浪須臾已覺天地別咫尺莫繪神靈狀坐中吳楚黔蜀客談  
笑波濤氣豪放僉云平生未見此嗟咤紛紛互推讓余亦燕趙  
慷慨人南遊到海乘秋漲枯槎一繫西江樹青草重斟洞庭釀  
有志欲逐溟鵬搏無才敢恨江魚葬詩成仍寄伏波祠布帆破  
冢知無恙

四月八日舟過浯溪

浯溪主人王大令手撫石刻曾相贈

前年試郴州時祁陽令王遠山遣余浯溪石刻兩

載湘帆幾千里至今始覽江山勝層巒峭壁窺清漪岸草汀花  
鬥明靚山僧導我度香橋一綫飛流下危磴指云此水卽浯溪



雙井三泉源可證三泉嶺雙井北注湘許大唐碑碣森琳琅漫叟

遺居但鐘磬遂披榛蘇讀磨厓文義慨慷字嚴正兩京恢復日

月新小臣頌禱君王聖元公顏公皆忠直鉅筆鴻詞寓恭敬後

人論古取鑑戒比擬石片懸秦鏡黃庭堅山谷米元章潘邠老楊萬里

誠齋有憑弔其餘作者矜題詠下埋塵土上入雲刻畫滿山無地

剩平生好古願初遂旦夕流觀意難罄唐亭晤臺矗南北倒影

湘波天綠淨巉巉數峯對空尊想見酡顏助詩興在昔三吾舩

美名自矜獨有誰與競柳州愚溪亦偶然安石爭墩且姑聽徑

思蕪草闢書堂況有祁山我同姓縣以祁山得名

### 義帝陵

居鄴一言三尺起新城一言重瞳死可憐二老真英雄提挈項

劉如孺子漢誠天授楚天亡大義所存世莫當不然縞素三軍

衆未必烏騅百戰強楚人自古懷忠信涕泣君臣同一燼角黍

蛟龍湘水深荒陵風雨郴山峻茆屋蕭穆石虎悲攀登猶有牧

羊兒但聞東海田橫島不見江南義帝碑

六月十九日舟過衡山縣尹汪湘筠原招遊南岳是夕

宿上封寺詰朝觀日出遂登祝融峯而還

七十二峯深停橈試一尋稻黃浮遠色松翠落高陰擁縣丹青

障沿村水石音不辭揮汗走上界足清心

九郡論文罷三年望岳行登臨吾輩事潭水主人情竹馬能迎

客籃輿遂出城谷神如有意雲霧放天晴

寺爲延釐建官如招隱來近山千戶集高殿五雲開出縣城西

山麓永壽寺駐巡檢左柏葉香成市每歲七月至十月四方

戶香蓮花石作臺遙思巡狩日藻火衆神陪



望日臺空闊

封在東

登高見十州天開瑪瑙甕

山

以置盛甘露

見於拾

遺

山著翠雲裘紫蓋峯如畫朱陵洞尙幽人間苦炎熱瀟灑此

清秋

帝坐通呼吸羣峯拱祝融丹霞猶石室鐵瓦自天風

上祝融峯

封寺在

西

北里許七十二峯最高處

有石室鐵瓦殿石多題名

郡縣參差出心胸浩蕩空題名吾未

暇蘇壁看青紅

茲山八百里遠脈溯岷峩五領聯緜接三湘池灑過樹留虞廟  
古花落洞庭多聞說棲真侶靈蹤滿澗阿

屋後小圃既成余意雜植花卉園丁周翁欲種瓜蔬力爭  
不得卒從吾好戲作此詩

北窗日長如小年南池荷葉生田田池上榆柳陰小圃瓜邪一  
徑無陌阡芒種甫過時雨足土膏酥潤清風扇亟呼老奴荷鋤

鋪分畦布壟隨方圓賣花忽來紫竹篠沽酒卻剩青銅錢馬蘭  
箭高笑石竹鹿葱葉大誇鳳仙夏菊五色亦堪翫花雖麤散光  
新鮮楚南周翁老農圃對花植杖心回旋但見嘉瓜繞籬落那  
聞九畹滋蘭荃殷勤勸我不如已面汗耳赤言語堅主人與客  
皆目笑置酒且復傳詩牋歸來秉燭坐深夜展卷偶得周官篇  
九職園圃毓草木注云果蓏無他詮三農九穀此並重自古粒  
食爲民天詩人賦物例樸質騷客摘豔空纏緜自從淫麗變情  
性乃厭布帛矜華鉛潘令栽花亦何有拔葵翻笑公儀偏作詩  
謝翁誌吾過細思終是翁言然

題蔣沛畬

慶

霖

聽松拜竹圖

聽松如聽琴拜竹如拜石高懷兩忻悅寓物不留迹琴妙一何  
深猶勞弦指音石奇良足愛而無冲虛心韋郎墨妙蕭郎筆能

近代詩鈔

祁寯藻

十



貌君心更超逸定知有耳厭絲簧未許低頭老蓬華風標磊落  
骨嶙峋撲盡人間萬斛塵始信陶公得天籟可憐米老作顛人  
澁懷園食筍齋圖黃寸園爲其弟小田作也余既移居斯  
齋而小田將省親南還留圖誌別題句奉餞以申離緒道

光七年正月十八日

食筍齋前竹千竒食筍齋後花萬朵西山窈窕窺牆右衆木葱  
龍翼門左寸園績事能傳家阿弟詩才更驚坐四壁常時對屏  
障六街何處揚塵堞涼堂燠館幾銜盃高浪長風送飛舸謝朓  
新詩付碧山杜陵老夢違青鑠展君尺幅情爲紆况我移居計  
已果鴻爪憑將積雪留燕泥忍使空梁墮陽冰小篆樵最工

爲撫食筍齋三  
字以復舊額

輞水名圖乞亦可厚報媿無韓幹馬強辭聊學

淳于輞君看幘首舊款題細字分明應屬我

款題爲五弟作余  
與小田年相若亦

五次

### 聞六弟約客來園看海棠喜賦

幽棲少經過閉門謝人事一自海棠紅連日嘉客至夜深燒燭  
照晨起舉杯醉客喜來及時花亦爲客媚那知天公巧一一先  
位置懷瑾握夜光有美豈終祕紛綸綿繡段金錯剪刀試裁成  
爲人衣幾見藏在筍去歲花事稀今春開特異封姨亦解憐不  
遣風捲地英英海邦彥塵堞厭都肆聞花便褰裳出城不用騎  
昨見吾弟書埽徑遙相遲呼童安筆研更復滌酒器看花對舊  
雨此意君須記

謂澧陽詠  
海棠事

### 忻州趙母張節婦詩

養姑者誰趙氏婦撫孤者誰趙氏母誰道含飴更苦辛老去能  
全趙氏後人爲壽母祝眉壽母謂九十如十九少年已作未亡

近代詩鈔

祁寯藻

十一



人今日白頭還此身身雖未亡心已死形管何心耀青史但願  
子孫孝且慈莫忘老婦養姑時當時機杼聲中淚只有鄰家媿  
婦知

莫春出游感懷

客從城中來邀我遊裂帛名湖湖隄久未上爲君著兩屐遙山逼  
斜照且復循阡陌不知誰氏園車馬無行迹入門竹籬在欹側  
數十尺疊石鏡清漪雜花媚幽僻沿谿幾轉折高樓出金碧下  
有千垂楊綠綫風中擲春來老梅樹包裹在葦席呼僮拆視之  
萬萼爭雪白洞房何窈窕深鎖無人闢畫屏山水色隱約見窗  
隙階前垂釣處短艇橫幾隻中流簫鼓競此樂朝與夕賓客誰  
最豪明珠綴履烏奉觴壽主人相期保金石歡讌曾幾日遺之  
如草澤當時意氣盛萬金良不惜所惜爽鳩樂飄忽人事迫浩

歌復三歎渺渺感今昔不見香山老作詩嗟廢宅

春海以山谷集見示再疊前韵

胎骨能追李杜豪肯從蘇海乞餘濤但論宗派開雙井已是綏  
山得一桃人說仲連如鷓子我憐東野作蟲號蟪蛄瑤柱都嘗  
徧且酌清尊試茗醪

次韵詩船西山寺海棠憶吳蘭雪丈

看花君道山中樂不肯紅塵插雙腳坐聽松濤灑西嶢歸來笑  
我園海棠花時蜂蝶春風香祇恐山中無此忙黔西詩客老相  
識白首對花應我憶記取牆頭好山色

蘭丈前年飲我  
花下賦詩投贈

初夏白城還園滇生惠折枝芍藥賦謝

帽影鞭絲拂紫騮小園西北是高樓朝回足抵還鄉樂花發渾  
忘下第愁

今年春闈吾兩  
家子弟皆報罷

婪尾春杯仍可醉圍腰金帶不須求



喜君池館偏瀟灑已有田田翠蓋浮

題顧俠君先生嗣立小秀野圖追次自題韵四首

茂京妙繪無由見上吉遺圖有舊題秀野草堂圖乃王麓臺臨

圖則康熙三十五年百四十年池館盡落花如雪覆春泥禹鴻臚之鼎所作

分得崑山宅畔蕉輦紅塵土此中消竹垞集有題副相徐公定

知投轄留賓地城鼓三嚴徹永宵

古事應須問仲舒酒龍詩虎劇狂疏草堂終有歸來賦敢戀清

塵第七車

小山窠石野王家清露戎葵隱士花留取水邨重寫本魏坤水

圖新城秀水一時佳句滿京華野圖首竹垞分書小秀

薦士詩答徐廉峯編修寶善

君知亨甫詩謂是八閩之張衡閩士張際亮能詩廉當塗尙書

聞而歎比之杜老逢左丞惜不能於百寮上誦其佳句俾之聲

價增致書門下士太息如以手撫膺首言蔡明經孝如朱壽昌

天壽其名嗇其生浙士蔡壽昌二梅學博文贈其張子今孟郊

窮以詩自鳴當世豈無韓退之力不足振姑與之飲酒如澠以上

生括當塗致許演笑君不識公與卿拂拭驥裏加繁纓胡琴搥

碎亦何益乃使江干野老悲此秋蟲聲仙宮窅冥雲霞局欲往

扣之雷砰訇黃鵠掉頭矯翼不回顧白鷗浩蕩誰能盟把君詩

卷心怵怵葉龍楚鳳安所憑君不見黔陽王宰亦奇士祇今坎

壘進退聽彼刀筆繩黔陽令王香杜金策

自題漫劬亭圖井序

顏氏家訓勉學篇吾嘗從齊主幸并州自井陘關入上

艾縣東數十里有獵閭邨後百官受馬糧在晉陽東百



餘里亢仇城側並不知二所本是何地博求古今皆未能曉及檢字林韻集乃知獵閭是舊獵餘聚亢仇舊是漫劬亭悉屬上艾時太原王劭欲撰鄉邑記注因此二名聞之大喜按今太原縣故晉陽也北齊移晉陽縣於汾水東漫劬亭在晉陽東百餘里當卽今壽陽縣地余嘗愛其奇字取以自號擬築亭以復古蹟宦游十餘年斯願未遂芸皋前輩爲寫此圖潤山繼之遂成二妙合裝長卷并紀以詩

誅茅何地起三椽潑墨無心得兩箋畫裏似聞人失笑谿山如此不歸田

西華南衡踏碧巉醫巫閭頂倚松杉袖中萬里青山色卻向秋

窗夢驚巖

壽陽有巖見隋書

卻略嶺亭堪築樓同過水小劣容舟如何一片團團月祇爲行

人照馬頭

馬頭惟月團團昌黎次壽陽驛句也

擬乞閒身奉板輿太行雲下有吾廬問奇便學王君懋盤肉都空且著書

### 新葺萬花深處吾廬與春海鄰

丁香七株花照天交柯連理爭後先中有海棠高過椽紅羅四垂凝春煙其三舊植一新遷絳宮之姝來翩然獨有文杏出屋顛高花未肯求人憐桑榆槐柳皆百年雙柏雖穉根則堅南堂風雨不可鍵重茅蓋瓦檐溜穿入門忽訝衡宇連豈必外樸中無妍鯁生居此如鷗眠夢裏不知三移船

余前後三入直

但指橋柱凌

波圓翦除蒲葦栽芰蓮鄰翁一笑裳乃褰吾與子觀清泠淵江鄉何日秧滿田蕭艾鬱鬱愁蘭荃鳴鳩語燕嬌且儗詩成欲付



冥鴻傳

苗先路讀段氏說文解字注

字心下部惠

知徐楚金繫傳姑蘇

黃氏顧氏各有影鈔北宋足本假觀之願形諸詠歎可

謂勤已次答以誌同好

波長說六書古文賴哀輯亭林纂五書音學允能執俗儒鄉壁  
造汗簡吞聲泣古音與今韻錯愕難收拾休文變古音得一遺  
其十平水變唐韻部分不可葺審音以定韻顧氏豈勦襲君守  
小徐傳上追復下指抗聲段壇金王郵高閒如雷啟冬蟄善本吾亦  
慕升階必由級會當求雙璧幸勿嗟孤立

次韻樹齋夏夜步月越王山麓

江路微茫見遠郊山城睥睨俯危巢萬家得月樓臺出一徑連  
雲草木包坐客胡牀聊與共參軍蠻語漸能教何人爲寫仙屏

句記取森森碧玉梢

次韻贈王棐友孝廉

筠

析疑爲我證羣書咀嚼菁華棄土苴夢覺雲雷動科斗笑看楊

柳貫魴魚

君頃與何子貞爲余撰祁大夫字黃羊說又與張石州釋魴季子白盤銘見示

通經合稱無

雙品載筆空慙第七車但許從君問奇字雄文奚必慕相如

石背溝紀遊述志呈家步衢兄

朝驥

石背溝在村東偏初遊日未涉其全但喜梯田勢高下向陽地  
可容三椽再遊乃陟南岡巔對面儼如圖畫懸北厓未上意未  
足市一月凡三至焉登高四顧山聯縣村如方罫縈一川茲溝  
距村不三里相地卜築形所便大河湯湯橫其前緣坡爲牆柳  
可編魚池雖堙泉不涸池上樹木皆百年由東而北折復旋如  
螺蚌殼斜且圓此中窈窕更曠朗築室遠望如神仙室成雜植

近代詩鈔

祁寯藻

十五



花木妍徑以碎石垣以甃竹籬柴扉互隱見幽澗小橋流涓涓  
南岡松柏栽宜先北厓作亭高如鬢此皆瘠土力可買一畝不  
費緡三千人生行樂各有緣何必金谷兼平泉況此先人所遊  
釣舊物不獨存青氈杜陵同谷遭迍遭黃精山雪愁寒天草堂  
昔日避兵處至今父老猶能傳君十一世祖繇居此邇來三世守  
寸田貧不一飽不忍捐知君愛此有深意意在世業餘粥饘田此

他日耦耕有志如石堅

擬築石隱草堂以復舊址

爲兄家舊園今漸蕪廢

余方喜母舊疴痊君亦早晚著祖鞭結茅相約卜

春海濬池詩奧思險韻不能學步別作北陂一篇答其意

北陂窈而曲環山以爲界上有吟詩廊詩中更有畫觀魚憶同  
樂君今感且喟闕如蟾蝕魄斷如龜坼卦蕪穢塞已久清流爲  
之隘君曰濬其流必先去其稗刮日出層翳盪胸失纖芥以茲

三日勞振彼十年憊多君用志猛能令人意快豈惟人意快天  
公亦狡獪頓令吹垢盡鼓以大塊噫墨雲忽飛來雨勢助澎湃  
曉起攬明鏡鬚髮森可怪得毋精氣動龍蛇走警欬君詩若潮  
海所伍乃與噲稍稍涉其涯瀕洞連萬派多才信卓犖小試輒  
豪邁君看黃叔度清濁兩無介更看阮嗣宗臧否口不挂吾詩  
亦饒舌雪壁慎毋疥

屋有土炕火則燥不火則溼毀之重勞乃疊牀其上戲爲

### 高眠詩

牀上施牀古所誚吾獨愛此成高眠火燥土溼雨可避布帳忽  
與承塵連元龍百尺那敢擬太邱一榻真長懸盆花鑪茗破閒  
寂矮几短鐙生靜妍朝回午睡林鳥妬喚起一縷橫窗煙石衢  
車馬聲喧闐來往箭疾無停弦閉門欹枕書在手七載夢斷春



江船客來笑我似乾鵲巢木不畏高枝顛何如枯藜坐穿膝曲  
象數尺能安禪

書香山詩集後感帥中丞事

中丞名承瀛字仙舟湖北黃梅人道光初年撫浙去官時

冷吟閒醉憶杭州誰識清風宦蹟留一樣私錢付官庫白香山

後帥仙舟

居易自書舍人為杭州刺史及罷俸鈔多留官庫繼守者公用不足則假而復填如是五十餘年及黃

集至郡文籍焚燒其俸遂止見唐語林

夢遊方山詩先君戍伊犁時作也偶從族姪元輔案頭見  
手草一紙追念潛然因鐫石嵌之山寺敬次一篇以誌

永感

三年一夢區脫閒愁心千疊祁連山碎葉城東卽歸路眼中蒼  
翠何時還華巖長者騎虎笑玉女闖露雙雲鬢卻尋少年蠟屐

跡嵌空苔蘚青斑斑春風一吹無遠近馬首萬里隨刀環芒屨

筇杖信非夢幽賞披豁天難慳憶昔劍呬侍登陟童心快若開

籠鵬夜深踏月萬松上人影出沒銀河灣三十年來憂感集腰

脚久遜當時頑不知神漢疏鑿處落葉荒榛誰與刪山嶺舊有池周可數

臂未折猶能彎猛虎掉頭龜曳尾山鬼一嘯銷陰姦詩中詠邊大綬傳青

事詩成絕域手自寫弔古慙破羈愁顏買山左券付片紙鶴夢

髮髯留仙寰墓田丙舍宰木拱人事變幻浮雲閒劉生妙手李

生筆此詩劉君其芳鐫石並摹鐫使我涕淚潺班超投筆老尙悔

裴岑遺碣今誰扳填胸舊事觸悲慨西望雪嶺橫陽關

漁洋題昌黎詩後云惜哉韓公不及此但取將相酬恩讎

予謂此特爲劉師命發耳先以馬援軒輊稱之末乃寓



以諷勸亦龍門傳游俠之意也

劉生跌宕非常儔韓公贈之良有由欲迴野馬入羈勒令取將  
相酬恩讎以德報怨老氏語洙泗定論垂千秋自從周衰大俠  
出睚眦一飯無時休文淵尙且論軒輊師命豈免誇遨遊公以  
讒謗竄南海同官不怨柳與劉淮西大筆亦直道豈爲毛羽生  
瘡疣推公此心爲將相芥蒂一掃空九州才高志大語倔強諷  
勸中有詩人憂羸提居士老詩伯此論未公吾不侔胡家癸籤  
更瑣屑蚍蜉撼樹羣兒羞胡震亨唐音癸籤歸山買瀟田數句  
以爲口實且云詩亦淺城南一篇示符子高譚公相輕鉏耰論者  
以是爲公病公病豈籍庸醫瘳涪翁手書有深意彼哉入室操

戈矛

山谷嘗書符讀書城南詩並跋後

客至君勿厭一篇

客至君勿厭聽我爲客陳自君歸田廬客亦何負君君欲問耕  
稼農諺述苦辛君欲知貴賤近市亦可詢君欲弄筆札造請踵  
及門村紙雖不佳山墨雖不珍助君之揮灑可以怡心神聞君  
遊京國四座羅朋賓清譚殊未已往往夜達晨今夕斯何夕客  
至愁且顰問君愁且顰君亦豈有因低頭不敢對欲對還逡巡  
凡子之所詰異乎吾所云商賈非我事貴賤何必分大賈以心  
計小賈算錢緡當其抵掌談錙銖而斷斷豈知白屋下糠覈衣  
懸鶉吾非厭此客吾言皆客曠農事吾所欣真言出天民尙惜  
此客少不能來如雲筆札吾所親自娛非娛人五乖與五合斯  
理難具論買菜但求益嗟賞徒紛紜所厭不在客厭此鑿天真  
書賈與市賈名異實則均以此三事較願與農爲鄰士農雖異  
業所業樸且淳吾性誠愛客愛客能論文南村有劉子號好古



篤且勤聞之不可見悵望冬復春北村解孝廉端讀書釜生塵  
人皆笑迂僻其言多不羣吾聞三益友友直諒多聞非此則爲  
損何以輔我仁謝客吾豈敢慎交古所敦持此答客難庶幾爲  
解紛

### 紀事

胡翁何許人寄食河間陂鄰村有巨猾牛氏擁高貲一朝盃酒  
間談笑生險熾猾也揮利刃翁無寸鐵持空堂走風雨霹靂聲  
交馳出入刀光中猾力不可支橫刀出門去更招諸健兒翼日  
決一戰衆皆爲翁危翁顧笑謂衆吾聊與若嬉翩然造其門猾  
乃盛威儀拔刀啗翁肉翁以口接之肉盡刀不出力竭難轉移  
噴刀十步外猾黨方潛窺劍戟倏雨集翁已升屋桶惝怳失所  
在猾也驚且噫再拜謝翁教請翁爲兒師兩載兒藝成翁請從

此辭兒復不自量欲效逢蒙爲倉卒爲翁困幾死於路歧翁也  
何許人里居人不知精精與空空此術何其奇或言事滇藩吳三

桂滇敗爲逃厮或云地行仙又疑老狐狸至今獻縣人傳聞多

異辭豪富惡少年睚眦無已時何當逢此翁一爲巨猾規此乾隆乾

問獻縣事頃有道及者作詩紀之

### 東軒詩爲張鶴巖先生作

東軒先生居城東行年七十顏猶童人境車馬不到處閉門終  
日吟春風講學授徒樂忘倦指畫所及皆發蒙四十年來壽川  
士以東軒爲師儒宗支分派衍潤百里其源則一流則洪先生  
明經不欲仕一第偶爾榮章逢春官歸來更瀟灑高想直軼冥  
冥鴻山國氣寒春事慵萬花獨爲先生容軒前嘉木手所植梨  
桃杏柳松梧桐橘柚桂竹皆南產水鄉乃有荷芙蓉盆羅池列



溢闌檻其餘名卉紛成叢先生樹人已百穫草木亦且歸陶鎔  
得非寸田生意足和氣所感無不通繫余弱冠屢摳謁論交安  
敢方膺融日長人靜鈴索語危坐若釣溫而恭豈惟清譚見滋  
味直使矜躁平心胸先生餘藝亦濟物堪輿金匱俱研窮城南  
王丈有同志登覽不藉青藤筇曩爲我家卜阡隴至今松翠長  
鬱葱宦游歲月入霜鬢顧盼卻媿方青瞳蘇家東軒在何許一  
籠載取愁髻翁豈如先生面城坐杖屨不出花香中黃塵滾滾  
駒忽忽開軒一笑看雲龍韓子猶知慕盤谷倪生何日歸耕農

海帆先生荷舟聽雨圖

道光乙未上試廂貳詩題菱荷聲  
孤舟雨蓋張文潛憶金陵句也

是科先生爲圖以紀江南因  
取此意爲圖以紀恩遇

手把芙蓉汗漫遊天風吹雨灑清秋詩王已屬陳芳國星使眞  
乘太乙舟仙掌西擎雲滿袖大江東去月當樓江面山樓月照  
時是科江南試

題定知露冷蓮房夜綵筆無人歎白頭

貌取江鄉入畫圖御屏詩句紀恩殊帝知巴蜀多文雅人比煙  
波一釣徒舊雨莓苔如有約同舟鷗鷺不嫌孤先生近權兵  
部幸得同事樂  
泉西畔吟詩舫準備先生倒玉壺

翰城出牧山右以畫障留別題句送之

松能堅人心竹能厲人節蘭不因人芳梅不因人熱王生爲我  
寫數紙其意懃懃可知矣謂我迂疏涉世深得毋俛仰隨時靡  
金臺落日春風多姚黃魏紫紛綺羅不能著色作嫵媚如此孤  
植可奈何王生來自離騷國香草樛枝夢猶憶塞上風沙逐馬  
蹄宦游蹤跡無南北我昨題君蘆雁圖離心浩蕩滿江湖留將  
雪壁霜豪在肝肺槎枒未肯枯

題毘陵呂氏所藏古甄文字拓本並簡苗先路堯仙編修  
孫從其



尊人官浙東時搜  
羅所得凡四冊

河間苗君製老嗜古獨寶獻王君子甄曩歲南游索題句歎其

寘身元光前申耆老人李兆洛先生顧而笑比之廉墓甄孰先廉墓甄

申耆先生官壽州時所得苗君失色恨未見倚坐傲睨積兩顴是時毘陵雪

三尺舉酒屬客江連天高樓夜深棲鳥動似有炬火明沙壩豈

知此册發光怪四明適有歸來船心疑夢想忽到眼雙橋古寺

秋鐙妍京華塵土留不得門外驪駒催著鞭古甄文字二百五

拂几一過如雲煙阮跋劉記具梗概其餘作者窮彫鐫儀徵剏

論有至理吳屋荷詞婉約包慎伯則堅攷古不妨互同異搜奇想見

精誠專海波不揚郡齋靜運甓有暇趨庭賢以金石壽求自壽

李丈斯語無閒然宣南客館感蕭索苗君鍵戶今三年手把一

編訂籀篆漢甄唐瓦私自憐君如有意與之角開緘發篋尙慎

旃毋令流汗走且顛

聞三兄鄉試中式感喜交集賦寄四首九月十一日

潦倒六旬叟名場十八科羞為長袖舞甘作短檠歌牢落同儕

少飛騰後輩多紛紛來好語驚喜涕滂沱兄自嘉慶甲子北闈秋試迄今癸卯科四

十年

歌莫哀一章贈田雅鄰頌年五弟

歲昭陽單闕冬十月為陽天寒木葉脫田君來自鄉八年始一

面悲喜熱中腸經旬復告別毋乃太匆忙對酒不能飲聽我歌

慨慷憶與君季舅弱冠同里庠季公年差長視余猶雁行峩峩

當塗師相士無留良目為晉垂棘聲價一日揚聯翩擢科第先

後升玉堂南齋清切地簪筆雙翱翔緬思鄉先輩陳澤州文貞公

孫興縣文定公屹相望遭逢亦何幸接踵仍褰裳季公性情介不

近代詩鈔

祁寯藻

二十一



與時低昂揮豪冠詞垣特達誠圭璋三遷京兆尹前績踰趙張  
胡爲身化蝶一夢追蒙莊維時余憂居傳語疑未詳駕言適仇  
猶峻阪紆以長慟哭車輪摧歸臥十月僵念君篤孝弟黽勉力  
不遑嗷嗷四十口逋負逼痛創孰爲問家室孰爲營殯喪孰爲  
焚券質孰爲指困倉南飛有鴛鴦從之以鶯鶯孤鴻鳴何哀羽  
翼不得將抱硯走千里葛帔衝雪霜永懷杖杜篇叢叢行獨傷  
京華感聚散鬢髮各已蒼宿我城南屋步我園西廊錄我案頭  
詩緘以古錦囊云是吾師集中有懷友章一讀再三歎溼衣淚  
滂滂勤敏詩六首并序問君歸何急君言適大梁側聞河再  
決拳茭事宣防青氈雖冷官畚缶庶可襄田蘇有舊游西河知  
子方況值魏文侯憑式名久彰梁心芳中丞京兆子蔚稌讀書署  
中君歸必有遇此志行見償嗟余涉宦海四顧天茫茫豈不遇

順風剝木非巨航往者策蹇約久要安敢忘二十年前與京兆有騎驢歸田之約  
常恐松柏心或負梓與桑別離不足惜惜此鐙燭光爲君歌莫  
哀一醉繫十觴

六月九日雨中還雙橋二首

記取新涼入伏天今年何幸又豐年澄懷舊雨多清暇相約柴  
門聽暮蟬

感河南直隸二案時久不雨四月十九日

新鄉民愚可憐納糧爭價毆及官阜平民窮可惜供炭責逋斃  
於役銀價日昂錢日賤以錢準銀民不便民不便可奈何官不  
便求益苛江南漕政弊已極其勢駸駸逮河北錢糧猶以公濟  
私官炭胡爲民給之炭價不足炭熱死何況納糧死徵比新鄉  
官爾毋謂民頑他邑催科已早完阜平官爾亦思民苦獸炭之



威猛於虎卜式憤言亦可取烹宏羊天乃雨

退直

退直蕭然一室清攤書仍是老諸生飢蜂掠紙悠揚去乳鴿窺

簾自在行塵外客來傾白墮趙伯厚張石州過宿園齋山中人為致黃精次榆

胡晉三孟康書來示讀近作兼寄藥物示卻慙吟興隨時減賀雨連朝句未成

題張石州煙雨歸耕圖

我昔耕田古馬首農書一編常在手即今委身錢穀中司農媿  
不如老農鬚鬢蕭蕭已如此讀書事業可知矣何怪思歸張季  
鷹鄉心不待秋風起君家絲蔓水我家漫劬亭溪聲與山影百  
里如戶庭荷鋤者誰似相識胡為箸書苦心力一笑真成笠屐  
圖片雲已逐雙飛翼翼缺歸耕孰饒田梁鴻賃廡轉悽然余與石州皆  
皆有悼何時共策烏犍去老向桑麻社酒前

曉發獲鹿過井陘宿胡桃園

七里瀧舟如紙鳶一人一綫隨風牽篋輿載我井陘口夢裏分

明上瀨船入山始用繹行

赤水鎮

平原鬱鬱有人家野店蕭蕭駐客車新米上街喧凍雀舊詩題  
壁剩塗鴉雲開已覺藍田近樹斷遙看渭水斜便借畫圖銷旅  
思秦中風景似京華

十一月二十八日抵皋蘭行館奉簡馮曉滄比部董醞卿

鍾石帆兩農部

隴雲萬疊隔春明坐對寒燈話客程河自蘭山下蒲阪雪從玉  
井接金城鄉心未免唐風戀驛使猶傳蜀道行奉使蜀省城  
改赴甘肅  
它日東歸尋舊迹看君佳句各編成



得六弟金陵書感寄二首

恩重慙君父時危念弟兄大江何浩渺劇盜且縱橫汝在書猶  
達吾衰命亦輕挑燈翫手札便恐畢平生

少日同憂患中年各奮飛遭逢殊不料時事乃多違報國心猶  
壯思親淚暗揮何由見顏色夢寐或相依

家書一封詩二首癸丑歲正月二十二日自京寄去越十日  
而凶耗已至吾弟竟未得見悲哉悲哉弟五兄寯藻病中自

記

哭六弟幼章

守威豐三年正月二十九日弟以金陵城歐血殞命二月十日省城遂陷

昨作兩篇詩揮淚寄吾弟賊氛蔽大江不知何路遞連日見軍  
報旁皇無所底初云汝登陴歐血已病瘠繼云病不支銜恨隕  
官邸余時直樞垣疏下不能啟欲讀恐失聲欲哭懼非禮慘愴

合寮來憫惜動宸陛手詔鑿丹忱硃批督尾溫語慰同體恩重死

轉輕志苦甘如薺九頓出丹墀感深惟雪涕

金陵石頭城城大守匪易吾弟氣素豪艱險曾不避武昌捍水

菑勞心為撫字運使旋擢廣東粵東辦劇賊更拜長纓賜以清

遠英德勦賊淨盡中丞屏藩莅江左安集先河次自湖南調任

書杜公奏派南河辦賑事履任未煖席楚氛已荐至巖巖制府

公抵掌運才智提兵扼九江庫藏悉羅致神礮五百餘盡數充

武備以上海購礮六百尊僅京帑六十萬併取毋遺置部議三十三

十萬守城督取之遺之以危城置之於死地弟曰謹受命空拳奮攘

臂爰集諸紳民慷慨陳大義首嚴遷徙禁先出眷屬示捐資峙

糗糧練勇除戎器甘苦與衆共賞罰無偏恣匝月規模成力竭

神已賴中丞尙虛懷制軍出省中將軍實同志將軍名祥厚副



金陵城陷力戰死之長城信足倚黽勉望疆帥

曷帥軍上游初議豈不壯舳艫亘千里江皖賴保障前茅甫遇  
賊一戰總戎喪翩然乃退死踉蹌棄兵仗匿跡歸白門譁聲撼  
青嶂僉曰帥餌賊吾民復奚望城中十萬戶湍決各奔放大府  
方閉閣猜嫌仍未忘中丞又徑去力挽不回頑哀哉一腔血噴  
灑何所向將軍承同寮抗疏陳其狀報恩誓必死天容亦悽愴  
赫然責失律申命易大將忠魂竟不待骸骨委幽曠追思債事  
繇後懦而前亢若使謀乃進據險審所當縱退時猶紆援軍勢  
可仰時向軍門及九江巖城民氣固內外力足抗弟借帑各關諸糧練勇布置周  
密民不驚徙若前軍徐退小孤東西梁山此錯竟誰鑄此災實  
重險不徹則向軍援至勝負未可量也  
无妄鯨鯢遂窟穴爨火助波浪全家更何有定付江魚葬夢中  
吾弟在告別已惆悵痛哭向南天何時見滌盪

宗姪立叔之鏐為余寫竹窗初雪圖題云長安米似珠一

雪關生計林下寄閒吟未肯忘斯世題後和之

一雪何足圖萬事宜早計誰謂竹窗外盡屬人閒世

武昌漢陽兩城同日克復詩以紀事十二月三日

昨聞收武昌今聞收漢陽捷書連日至悲喜難自量回思債事  
時賊勢何猖狂將兵在得人旋轉如風檣前年南軍下儒帥來  
湖湘曾公左右惟賢才文武資助勳塔公羅公皆一舉定武漢

再舉安蘄黃揚帆越潯口直欲趨建康守土彼何人乃致餘燄  
張平生負韜略聞賊先倉皇坐看鼠變虎縱令狼驅羊哀哉江  
漢民三度罹禍殃睽睽兩大星相繼實厥芒塔公憤卒中丞出

巴陵胡公撫節帥移荆襄總官公督分軍扼南北翦翼搃其吭軍中孰

健者楚材實最良楊總兵載福李觀察一日克兩城陽氣回冬



藏當其經營始兵力猶未遑及乎謀定戰快若決潰創擒賊必擒王挽弓必挽強二三英雋出勢已摧櫓槍乃知壁上觀何如雖處囊前車數可鑒思患宜豫防願聞鐃吹聲日與江水長

喜聞黃州克復即賀雷少泉 十二月十一日

江漢重城一日收前軍又報下黃州楚材杞梓歸開府武昌黃州兩郡

皆中丞胡公南岸一軍克復李觀察楊總戎功最鄂渚旌旗據上游雪夜擒渠城四關

樓船破虜水東流李以陸軍攻入郡城分明結伴還鄉路吟望

無煩杜老愁少泉家黃岡之陽邏鎮

### 觀齋歌

宋揭摹勒淳化軒軒以帖名溯其元成邸有齋曰詒晉至今陸

帖傳宗藩避暑山莊舊藏本南齋拜賜珍瓊璠乾隆間重刻淳化閣帖置淳化

軒寓藻曾蒙賜本上鈐避暑山莊御寶蓋熱河行宮陳設也湘林手撫士衡筆寄我鐫石江

陰園陸平原摹復帖真蹟成邸賜本薩湘林都統曾覃谿老人自盛京摹寄江南因爲上石留置學使西園

信好古大觀殘本題萬言二十七帖一千字冊首題云大觀帖凡十一月十三行北平翁方綱除鑒藏目字字龍虎神騰掀山陰筆札

具于是晉觀作堂成例援晉觀谿名其堂曰嗟余何幸獲此本甲

子一周如逢原適光壬寅歲得此本臨川李氏寶全帙見此四

坐驚且喧舊揚全本較此遠遜草書忽忽苦未暇軍書旁午趨

樞垣務海置夷緘藏篋笥十餘載退食偶展芸窗暄遂以觀齋

自題署如壁上觀旌旗翻心摹手追都到雲煙過眼經幾番

名雖襲翁實自媿但愛野鷺窺籠樊槐街老屋臥三載閉門聲

不聞輪轅猶有墨客闖其牖一榻未許懸陳蕃開緘細字珠錯

落怪翁何事不憚煩初觀色動疑嘗鼃熟視知味真熊蹯人間

氈蠟輿臺耳棗梨銀鋌空銜冤平生驕筆好馳騁臂痛無力勝

近代詩鈔 祁寯藻 一二十六



橐鞬自從石渠見快雪右軍快雪時晴墨蹟咸豐初元會蒙賜觀并命賦詩俗書一掃枝

葉繁抱殘守缺厖有此摩挲晉解思周顛祇愁眼花墮雲霧神

骨不辨驪騮觀空觀色總如是真相何者為泥洹翁今仙去

我衰病池水餘墨流潺湲小齋那須鐵門限詩成目送飛鴻鶩

元日簡勿齋

一千里外平安社社里名居六十五年淡蕩人因病得閒三餞歲在

家如客兩逢春今年較遲立寒鐙相對詩為伴舊雨頻來酒漸親獨

我與君無箇事門前流水似車輪

李文正慈恩寺詩文衡山西涯圖合卷為葉潤臣閣讀題

并序

西涯圖文衡山為長沙李文正作也文正致仕後於正

德九年與文宗嚴太僕喬白岳禮部昆弟為慈恩之遊

賦詩四章感舊紀事屬太僕姪衡山寫圖大小凡二圖

成而文正已捐館此其小幅也與文正詩卷連裝喬跋

詳記顛末時白岳已為大司馬矣後有康熙年間仁和

湯西厓右曾跋并次韻詩咸豐六年八月潤臣侍讀持

以示余余復從侍讀假觀詩龕居士存素堂文集記文

正居址別業祠墓甚詳其西涯考多采取湯跋又跋蔣

湘帆影摹西涯詩帖及西涯跋詩并云於蘇齋覩石田

移竹圖又得文待詔西涯圖摹本蓋即從此圖臨摹者

十二月侍讀復以蘇齋屬石門方蘭士薰之友陳默齋

所摹西涯別業圖并朱野雲鶴年補摹成齋竹舫圖陳璠

字玉汝長洲人官南合卷見示翁詩有豈執衡山卷似

無之句蓋亦未見文蹟也侍讀獲此二妙可謂翰墨奇



緣矣

慈恩寺接西涯西西涯門外沙築隄停雲一片照積水至今煙  
樹猶淒迷懷麓老人老安歸案無魚菜田無畦惟有門生數來  
就尋秋時復尊酒攜酒酣得句晚鐘外層樓秋色不可梯瑤琴  
三弄意未足曲終一奏神尤悽豈惟釣游感今昔亦因時事傷  
羈栖南山猛虎誰敢射湘江鷓鴣空自啼當時賦詩寓鶴歎更  
藉妙繪留鴻泥圖成人去客悲慨潭柳不聞班馬嘶孫叔衣冠  
子孫落晏嬰市宅塵土低祇餘卷尾數行跋珍若截肪十襲緹  
文章領袖擅前代楊李大名先後齊即論篇翰見風操湖州畫  
待坡公題後來西厓尚傾慕詩筆雙絕超凡蹊鳳閣家藏有夙  
好袖出萬頃青玻瓈方朱兩本並落手墨緣直欲誇覃溪對山  
偃蹇茶陵病史論自公堪互稽我從詩龕證詩境豁如銀海遭

金鑊石田移竹雖未見拙老油素無煩齋蔣湘帆衡以油崢嶸

鄉思忽滿眼白岳遺墨曾攀躋喬莊簡字吾鄉先輩今平定

韓齋雅集圖為孔敘仲題戴侍郎作

戴畫吾有三山水多平遠西山雙橋精舍與西湖去年自錢兩

地情繾綣獨有憶松圖為吾鄉作雄秀爭絕巘此圖酷相肖陡筆

無一偃自題云密白云師造化意匠闢關捷韓齋文字飲望雪

迫冬晚蒼翠忽飛來寒林出高蹇即此抵寫真忘形到嵇阮竹

亭疑聽雨誤筆乃更婉敘仲即以此為雅集圖姚雅集新例

奇緣增藝苑九年三上元題句何宛宛頗怪畫通神若與時推

挽足音在空谷幽芳託蘭畹亦何必見戴乘興聊往返戴鹿林

日生畫作於己酉上元葉潤臣題  
於甲寅上元今年上元余適題句

消寒七集題憶松圖二首



五十年來影答形眼中山色夢中青萬松圍住三間屋可是縵

紉弟二亭

那文殺曾為余書  
縵弟二亭額

鹿牀居士謫仙才借我離愁付酒杯十載孤山鶴飛去孔賓何

事不歸來

錢唐戴侍郎道光二十七年為余作憶松圖今侍郎  
高隱已及十年而余仍以老病留滯都門展卷慨然

戒師欲於寺後起七丈土岡復毘盧閣舊址借詩船韻頌

之

老僧不放景光閒種樹移花晝掩關猶為登臨歎塵劫徑思披  
豁露天慳願深那計年遲莫居近何辭日往還會待眼中來突

兀隔城招手得西山

正月晦日有感

季弟諱日

城南臥病將三歲江上愁心已四年歲歲春消殘雪裏年年淚  
落早花前花飛尚有成陰日雪盡還逢作雨天天若無情人不

老何為此日獨潛然

紅巖碑歌為王嘯山

發桂

作

嘯山典試黔中得摩崖拓本  
劉寬夫坦題呂堯仙倭孫重

摹縮本  
並記

紅巖插天黔西陬上有萬古不死之赤蚪拏雲掣電鱗角出化  
為雨粟神鬼愁方圭員璧羅尊占金繩鐵鑱珊瑚鉤或云誓苗  
碑遺自蜀武侯漢隸俗書那髣髴二篆史籀俱非儔或云殷宗  
伐鬼方鑿山勒石銘厥幽傳巖一夢且圖象三年偉績豈無文  
字留後人好古喜觀怪鐘鼎款識窮彫鏤何況爰頌燦然簡冊  
具震用來享聲靈迺叱馭使者片紙笑藜火一照回雙眸毘陵  
中丞手摹本疑是湯孫有綴旒細觀刻畫體尙質祖辛父癸差  
相侔千搜萬索忽在眼韓公浪自悲猿猱响嘯碑邽陽鼓石不  
能言器則古羅施鬼國今編戶神物晚出斯為伍我詩姑質王

近代詩鈔

祁寯藻

二十九



劉呂才薄敢望博士愈

附錄呂記

右碑文在安順府永寧州五十里之紅巖山磨崖文字奇古三十餘字碑高丈餘寬廣倍之歲久剝落筆畫猶可辨識俗傳爲諸葛碑則以其地有諸葛營也無論武侯軍此史冊無徵卽考之漢隸文殊不類或有釋爲殷高宗伐鬼方紀功之刻者細釋釋文亦多穿鑿附會似難徵信然其結體古茂字畫渾勁與鐘鼎古篆相類直足上儕禹碑其爲三代之物無疑也購揚甚難非疊架重木集數十人之力不能得一紙爰依其丈尺以十之二縮臨此本以便觀覽咸豐壬子長夏陽湖呂佺孫識

詠莪相國示讀松風閣近作有題余所贈華岳圖詩次韻

奉答

我本晉鄙人結廬近潛邱老病滯京國家山虛臥遊夢中青蓮華遠接天西陬卅載兩經過惜未攀巖嶠古翠落襟袖一紙空復收每望太行雲遙指仙掌秋公今作霖雨傅巖應旁求此圖合持贈我亭已休休聚米畫山谷靜對資冥搜中條太華間元氣爲詩留坐聞松風聲心有江海憂層雲已盪胸公詩有岱宗會登眺之句玉井方洗頭尙憐失羣雁汾水心悠悠

慈仁寺柏槐皆數百年物也元時雙松今已補植獨此蔚然尙存閏夏雨後與客納涼其下歸而賦詩以張之

慈仁古松不可見雙龍變化今成三尙餘鱗甲入圖畫僧繇妙筆傳精藍張詩有松圖其旁柏槐額更古蒼髯老友彭與聃游人題詠顧弗及時有野鶴相對談直榦豈肯作蟠屈清陰亦復能



包含念茲嘉樹欲延譽才薄固知起不堪今日涼堂雨送客萬  
綠一洗神姿酣柏兮槐兮四君子衣冠甚偉鬚眉鬣回看三松  
少氣色黃綺山立蕭曹慙苦心堅節閱世久時乎未遇沈淪甘  
西山偃蹇城之南欲往從之車脫驂松壇竹院忽有得坐臥其  
下吾非貪似聞空谷足音喜佳處早已留茅菴頌借竹院過夏

奉輓陶鳧薈標少宗伯前輩

憶昔登科初後公惟六載弱冠甫過二公年長及倍習儀瀛洲  
亭始識公風采聞公少擅名文壇樹矛鏘早入王錢室覃思得  
模楷詩如連城璧詞亦珠百琲晚成敢笑援一舉乃知隗祕館  
方紉書官軍正授鎧忠義及輿臺聲名動朝宰嘉慶癸酉年事五馬一  
麾出浮沈涉宦海回風偶退鷁直節遂冠獬終爲國屏藩入作  
帝元愷任官兼考禮公望屬鼎鼐憂時怒如擣善行敦不怠去

冬抱微疴歲杪組暫解豈謂不愆遺百年竟難待朝廷軫耆宿  
褒榮式寮來翁固矍鑠哉文學實嘉乃當公大耋年賤子病且  
殆繩牀藥裹間垂問勞每每語以健步法神完氣不餒七發嗟  
未喻三折但餘悔比年誦公詩老筆花生彩觴詠寓哀樂歲月  
送瀟灑昨復示新句一紙斜行矮空堂雨未成臥病興難罷曲  
高識者希勉和媿凡猥長椿再相見扶杖手承頰疏弦頓絕響  
芳塵倏遺躡亦知躡箕尾逝將覽溟澥空谷無足音誰與佩蘭  
茝公誠神仙流此度卒不改至今香山社問年尙疑亥寂寥城  
南宅近市乏爽塏柴桑有令子松菊徑猶在老成日凋謝感舊  
足悲駭忘年交有幾晨星何磊磊揮淚望大江東去不可匯  
得舜卿先生書以其弟質齋喪來告寄詩奉慰兼致令弟

春湖

近代詩鈔

祁雋藻

三十一



客從并州來袖出尺素書開緘見手字離思忽以紆披讀未及  
半慘然增欷歔君有同乳弟解組十載餘清風在晉楚民曰父  
母且泣官凡四邑事不假吏胥青衿服其教萬井安耕鋤庭無  
雀鼠聲稂莠已剪除不爲赫赫名去乃思厥初統統城頭鼓送  
者舟與車僉曰賢哉侯侯去民何如侯曰予有兄風雨時念予  
淖之水悠悠老將從之居豈謂老且病戎馬生郊墟閒關三千  
里避地辭鄉閭寒裳就季子涉彼汾沮洳流離有骨肉遑問田  
園燕去年遺我書急難思鄂柎示我朱履篇意度何其舒烟氛  
暗濤霍劫掠無時虛六國旣重陷三老復一徂達者雖云達所  
親焉得疏况爲異鄉客堪此形影孤書來語更慟生死同一塗  
掩書不能讀淚下霑我裾白門未歸骨有弟今則無兄衰久臥  
病杖履不得俱太行雲在眼渺若天一隅吾亦老留滯知否得

歸與人生如逆旅暫聚聊可娛飄飄風塵際何地爲吾廬君固  
文章伯門下羅生徒季子亦矍鑠子孫美且都念與君昆弟結  
交久不渝相期比金石各保歲寒軀更願加殮食報君雙鯉魚  
誰能烹此魚佐以酒一壺一酌醉潛郎再酌醉老湖

自題漫劬亭集

規樞壹齋集髣髴結埼亭奇字得家訓故鄉存地形詩名卑不  
稱宦味老曾經慙媿香山社閒吟任醉醒

葉潤臣孔敘仲招同張詩舫何通甫孫芝房家叔和慈仁  
寺餞秋雅集繪圖賦詩分韻得好字

松寮往來熟屐齒痕不埽西風送落葉黃蝶辭蔓草繫我同懷  
客惜此秋意老零霜感時節酌酒寫襟抱舊題猶在壁新句已

脫橐

林穎叔是集成

未

怡園筆尤健老樹花偏好羣賢各奏能顧

近代詩鈔

祁寯藻

三十一



我思枯槁筇枝尙可倚石磴期同造遠峯入窗隙斜日出鳥道  
鳳閣兩詞人幽蹤事探討不嫌客歸遲但喜公退早五嶽有散  
仙東去蓬萊島何時重把臂一坐爲傾倒子貞時還山東

爲潘木君

鐸

題洞庭歸帆圖用陳子鶴題王嘯山岳陽晚

眺圖韻

長沙一城扼衡陽單車慰彼都人望軍如挾纊氣百倍天狼奔  
墜弧矢光當時同舟孰共濟羣論共推彭城張功名立身病  
退嶽雲飛送南歸檣洞庭樓高川路永滿目煙氛迷故鄉青草  
扁舟一落手三年客夢千回腸至今燕臺且流滯北雁未忍思  
南翔南海使者亦登眺畫圖自閒軍書忙豫章尙書爲題句直  
從岳鄂論荆襄君與尙書各捍患江湖接壤天蒼茫樓船那許  
久藏壑錐穎旋見重出囊披卷沈吟感舊事湘波瀕洞連吳閭

慈仁老僧招看西山積雪汲新泉煎茶

十月二十六日

雪後風夜寒曉起天宇淨松下童子來叩門若有請言師遠眺  
望積雪與山競收入玻璃窗眉間白豪迸豈不自怡悅獨祕非  
佛性枯筇已久待凍鳥紛交迎一笑眼驟明未語神先覓圍鑪  
淪苦茗松竹亦相慶新泉倒玉峰萬象入圓鏡初來午日煥欲  
去夕風勁清景偶得之已過不可更世有工畫者媿余乏高詠

香山詩集題後

再讀香山集回頭二十年

道光十五年里居曾讀斯集

於今真致仕在昔慙

歸田不是當閒境誰能別樂天置身牛李外琴鶴獨翛然

微雨遣懷

正月二十七日

茶竈屋北角竹籬緣西廊階東立板壁屋南臥花牆花牆三尺  
餘矮樹翳叢篁板壁不及檐聊以界前堂前堂面三楹左右聯

近代詩鈔

祁寯藻

三十三



耳房南軒正相對小窗如野航中有一病翁出入人扶將時聞  
讀書聲病久聲不揚延客偶軸簾客去茶餘香春花漸吐萼微  
雨滋羣芳豈惟應發生亦可蘇羸疴側聞官軍東早晚收高唐  
乾坤何浩蕩卽此抵還鄉

天台藤杖歌三兄以六弟舊寄藤杖分貽一枝感歎成篇

天台藤杖四尺長吾弟昔得之武昌靈根萬年出華頂天台山志萬年

藤出華頂可爲杖雙莖遠寄來漁莊漁莊老人閉目坐得此健步遊於

鄉竭來千里走京國憐我久病須扶將貽以赤玉堅多節呼爲

直兄名適當清異錄廬山比邱海鳴呼吾弟在何方金陵烽火

連維揚幾年斷我鴻鴈行魂兮歸來渺無路安得擲杖爲橋梁

婆娑兩翁傷塊獨手把靈藤抵筭卜細看杖頭刻鏤文白鹿煙

雲接神蝠杖刻鹿山古名神蝠有白鹿山方山古名神蝠李明柏碩那可見見朱竹坡萬年藤杖

歌 拄頰仙山想飛瀑

蔣霞舫給事達以其尊人念亭先生蜀闈遺翰並姚石甫

所記事蹟見示感歎奉題姚石甫瑩康輻行草載嘉慶年

冤獄事甚詳

今我忽不樂展書忘夕殮一册數千字中有忠烈魂蔣侯存手

澤慘澹青藍痕蜀闈昔分校文章勤討論家藏五十載斷紙珍

瑤琨給諫示我讀流涕聲復吞更觀姚君記老淚不可捫上言

前藏事奇冤陷覆盆中言制府公飛章叫帝闈但蒙日月照骸

骨終銜恩下言遺愛民纍石高崑崙蕃漢爭廟祀歲時肅駿奔

此事萬口傳公道照乾坤姚君擣大筆信有神明存神明無不

在遺翰粹且溫早邀朱衣鑒豈識獄吏尊雪山萬里白金沙流

不渾君今抱沈慟世已高其門讀書念先訓守道貽後昆諒哉

近代詩鈔

祁寯藻

三十四



夏侯言陰德及子孫

藍公教織歌

冷壽陽春晚無花秋早霜山農卒歲苦寒逼但知力畊不知織  
自從藍公宰吾縣男製紡車女紡線大布著身衣裝棉春風一  
吹三百年藍公下車初念民勞且愚魏風曰縫裳唐風曰曳婁  
蠶桑雖不事木棉亦所須摻摻彼女手胡爲不織與民曰無織  
具公爲置工作切減民曰無織師公爲置女傅置傅數百家置  
工數十處十日一張機五日一匹布以棉作布布易棉工精布  
細勞以錢貧家棉少錢不足官困更指麥與粟藍公來自膚施  
明之季萬歷時秦中鉅族擁高貲棉萬斤布萬匹金多不知幾  
千鎰前車載滿後車溢毀家爲民謀家室一年織事成兩年獄  
訟清三年機杼不空鳴篝鐙萬戶聞書聲廉叔度來何暮昔民

無襦今五袴朱仲卿葬桐鄉子孫不如民奉嘗前人遺愛後人  
表藍公去後知者少若非吾鄉張君手自記一紙收藏始順治  
我公苦心何所寄邑乘寥寥數行字馬首老農老更慵作歌猶  
能歌我公公傳宜補循吏中公祠宜傍泮水宮大書深刻碑穹  
隆要使城鄉市鎮九十有二所人人歌舞公之功君不見韓公  
亭月團團苦說邊城特地寒藍公衣被在四境行人莫愁壽陽  
冷

題王定甫龍壁山房詩稿二首

文章出入杜韓間壯歲憂時未解顏孤憤一篇詩史在北征終

合勝南山

仙人縹緲好樓居

君園直居

拄頰看山且讀書不用詩成愁獨

立退朝尊酒卽鄉閭

朱伯韓申甫霞紡

近代詩鈔

祁寯藻



立夏後一日長椿寺牡丹初開漫題

縱無風雨曉猶寒尚有蘆棚護曲闌培植一年開十日人間富  
貴作花看

送三姪世齡還文水學舍

阿兄莫怪久盲聾阿弟居然一病翁望汝健為松柏後生兒超

出渥注中寄書我更慙王昶魏王昶誠子弟書薦士時方慕孔

融何事年年暫相見來如春燕去秋鴻

黃岡雷少泉孝廉春沼以吳制軍金太守殉節紀事詩見

示感和二首

制軍諱文鏞字甄甫諡文節  
太守諱雲門號菊仙安徽人

吳公督兩楚當賊再擾後移節自滇池直指漢南柳維時武昌  
城還定猶未久慘澹斬黃間已為狐兔藪衆論頗猶豫勢且委  
而走公獨按劍叱決計謂可守密與南軍約曾濂笙侍郎督水  
陸軍自湖南來

謀定毋敢苟豈知小人腹猜度成擊掎以戰為公責以守為公  
咎死志公早決義不忍汗垢慨然誓師出兵力未云厚堵城初  
遇賊前軍幾獲醜舟師距上游觀望乃虛負坐令長城壞大星  
實如斗貽誤者何人中丞吁禍首向使從公計和衷無掣肘北  
軍扼賊吭南軍併力取何至城再陷玉石紛踐蹂方公騎箕尾  
讒舌仍張口皇天鑒孤忠彼譖今何有平生知交寡公為予畏  
友予弟出公門幸不辱所受郢中有哀歌感涕到衰朽側身望  
大江蕭颯風生牖

金侯楚循史素能治繁劇崇陽古沙羨亂後逋賦迫漢東隨為  
大民困亦未釋憲府聞其名廉惠盟夙昔每於艱危地量移藉  
碩畫侯亦勇任事奔馳不煖席予弟守武昌一見心則憐歎息  
寄予書云是楚之璧禦災庇嘉穀小用殊可惜前年來京師詢



以制賊策首在斷火藥嚴偵奸宄迹其言實扼要已足褫賊魄  
哀哉志未伸終於二千石一門殉忠烈千載名烜赫匿孤有程  
嬰陰德遺清白古豈翳寒泉疾風摧勁翮羊質而虎皮碌碌何  
足責

長夏檢書二首

日長何事不能閒又向西堂筆硯安老眼看書看不了欲存書  
目當書看

問君書籍幾多儲半自藏書半寄書師友不存吾老矣看書心

事欲何如

陳石士夫子張石州  
兩家書多寄存宅

白香山像爲葉潤臣侍讀題

樂府篇篇筆有神醉吟瀟灑亦天真緋衫黯澹猶堪著誰識青

山獨往人

春草吟

井序

感舊作也嘉慶乙丑之歲余年十三侍先君子讀書比  
部之北所偶命賦春草詩慈顏有懌越月前事得白遂  
蒙寬政迄今追憶感慨繫之矣因以春草名廬并記以

詩

春草復春草感時亦自好春來春去五十年昨日少年今已老  
長安久居大不易富貴何須置身早春風吹愁亂如雲白髮苦  
吟何日了夢裏無端誦舊詩詩中猶有淚痕垂明知不是江郎  
錦拉雜摧燒亦可悲



近代詩鈔

陳偕燦

字少香江西宜黃人道光辛巳舉人官福建惠安縣知縣著有鷗汀漁隱詩鈔

吧雲樓詩話咸豐乙卯余將入都先生亦以江右肅清倦遊歸老

哭少穆先生

八桂干戈日三朝社稷臣登車猶力疾拜表已忘身出處關天下安危繫此人何當悲薤露遺憾滿征塵

天地黯無色原頭夜落星一生完大節九死出邊庭

西公會城古

驛燈微碧芳郊草自青故鄉遙隔處風笛咽郵亭



近代詩鈔

梅曾亮

曾亮字伯言江蘇上元人道光壬午進士官戶部郎中  
有柏枧山房集

贈胡聖基

腹有詩書面有垢古人古人終在口揚眉欲陳策二三低頭不  
知椽八九先生讀書不食肉弟子肥瓠師瘦竹平生齒冷登封  
書行藏不須季主卜

偕異之遊東城

辛亥

推書出門無所之訪君深巷無人知署門七字異常語排闥直  
進中哦詩主人相見一撫掌作此窮讀寧非癡君言東城有佳  
處衆山可對盃可持行行且止雜笑語經過闐闐穿東菑荒園



昔日爲誰好嘆息吾行猶古道野桃蓄縮不著花春泥棲苴斷  
行潦臯壤餘意兩人同踏盡空林葉如掃每思寂寞何所愛故  
是成虧了不早春鶯三請楊柳陌似言誰家杏花白不嫌隨處  
好生哀佩壺同覓曼容宅

文峯家塾留別族中諸子

家塾依祠廟諸村抱若環四山皆我有一水去人間物力應稍  
薄宗風尙可還無忘經始者辛苦闢茅營

句容舊柏庵謁文穆公石居公墓

暫作僧房住荒寒悟道根梵音秋聽徹佛像夜觀尊月過山扉  
靜燈留土室昏披衣喚徒御猶戀布衾溫

九月偕明叔赴安慶過蕪湖王子卿丈招飲陶塘園

名績黃樓著家園綠野開忘年商近律話舊緩深盃隔牖山先

到穿籬水暗來一麾休自惜居處尙蓬萊

得家書口號寄仲卿彥勤弟及淑儀妹

滿意家書至開緘又短章妹詩因病嬾兒札似文荒賴有阿甥  
語因知嬌女長尙疑書紙背反覆再端詳

季弟近何事時應手一編長閒成病體最少已中年高適詩無  
敵荀卿賦可研古人多晚學期汝似前賢

買書四友歌

晉魚見書口流涎到手恐有他人先索價不畏高如天歸來障  
簾傾銅錢明叔愛好不求全索難得巧意氣鮮細尋脫簡抽間  
編磨丹細字書盈顛張子游肆如林泉瓦南街東可忘年客無  
牀坐書相連不破一錢聽管絃自笑買書如買田循其四角及  
中邊重裝自釘端不偏未得一讀手爲胼



程春海侍郎人日雪後招飲龍樹寺中

家居好遨兼愛雪每眺鍾山登掃葉長安雪少風苦多卷地追  
奔去飄瞥空庭積素不忍掃自撼枯條添落屑侍郎招客集龍  
樹萬象一白真奇絕混茫直接西山頭界畫城陰肪一截行人  
飛鳥俱不到空宇蕭蕭見真悅甘醪名論未覺晚月氣寒光半  
空結盪搖天影倒平地江水橫鋪波不裂悄然坐我浮玉山夜  
聽談天答鈴舌是日瓦南街可步愁洗靴鞮因迴轍王充閱肆  
且異時昌黎登高幸同節醉歸默數前車燈猶記江船火明滅

書示張生端甫

我年未及十我祖授書時襟裾戒牛馬解授城南詩覆醢悲子  
路讀記淚綆縻謂我有文性祖亦爲嘯唏先子留上都我母課  
中閨文選苦難字背誦行遲遲十九始出遊雜覽如亂絲攬取

得尺寸首尾終迷離吳門遇王涓交我顧廣圻語我六書學訓  
詰宜兼之凡校古人書不以他書資古書各義例熟玩窺其蠡  
慚非性所好負此良友規頗獨好文詞俳偶自娛嬉異之管君  
同謂此不足爲此猶冠玉耳不見骨與皮皮骨且不見安能爲  
妍媸是時文派多獨契桐城師洪鐘未殫叩閤響忽我遺言往  
理稍出徐徐會其機讀書如養生薰蕕不同脾豈食大官羊腥  
賸雜螯螟三史范已孱陳壽無華詞五代事簡略詞義獨恢恢  
老莊荀管韓國策逮楚詞淮南呂春秋譎詭而倡披六經爲稻  
粱此亦膏與脂不可一日無使人發華滋適口莫如約拙養聊  
自怡劉君稱漢聖董生書玉盃謝力有未能吾知固有涯吾子  
天骨高古風還可追鵠卵在啄抱庚桑慚魯雞倘欲師古人爲  
子誦所宜



偶成

撫軍原自知彭澤掌武何曾困樂天富貴豈能知己助聲名不借要人傳

偶成寄仲卿彥勤兩弟

柏枧村中有故基吾宗苦約返茅茨黃精藥好愁難遇蒼耳林深恐見欺北阮家憐門戶改南陽阡冀子孫知飛橋一水千峯抱記取他年謁墓時

百年寄圃冶城旁舊德猶存綠野堂祖父艱難留樹石弟兄奔走隔壺觴極知飲啄宜山澤又恐鳴號望稻梁空憶故園春色返半千閣下又青楊

監利王子壽去刑部主政歸作詩寄之

君竟翩然返故居題橋應笑擬高車寧編荆楚歲時記不讀司

空城旦書詞賦飛騰聊自喜江山遼落興何如懷人若問吳門卒尙有詩狂未掃除

六月二十一日歐公生日集邵位西寓齋朱伯韓曾滌生

周岷帆龍翰臣劉蕉雲孫芝房與曾亮凡八人以天下

文章莫大乎是分韻得乎字芝房編修是日撫琴

元和文章逮宋初中間五代荒榛蕪已往者韓未來蘇艱哉一手公芸耨我思其時執鞭趨或從水涯伴山矧子美曼卿介與洙不彼棄或辱收余年徂運往不可俱高齋見公空畫圖謂公生日不可孤主人觴客皆英儒公有至言非自諛惟文字者無窮歟若使後人嗜好殊今亦誰復知公乎世人之壽百歲徂公八百載猶須臾神理無盡不可誣今日爲壽良非迂況公守滌翁自呼其年四十未有餘一視老壯齊榮枯豈復形骸爲有無



衆賓一笑有是夫更彈醉翁之操爲公娛

出都偶成

不須松桂悵巖阿屈指橫江一月過歸去交親耆舊少近來文字墓銘多但期筆札傳通子莫話功名歎阿婆一笑窮愁原故物幾人黃壤更如何

雜咏

方山以方名近視形亦禪山遠遂無坡人遠覺多可書中賢古人把卷淚常墮能否當時人欣慕亦如我

惜抱軒集於江寧山亭野寺多游覽之作今聞其地皆已

灰燼感賦

莫愁湖上泛春波掃葉樓中詩興多鶴髮烏絲詩版地黃壚今日渺山河

攬勝探幽步履輕雨花臺上俯江城當年觴咏尋常事何意悲歌動後生

萬松古寺孝陵旁墨妙常懸老遂良欄檻飄零已惆悵那堪歸燕更無梁

讀杜詩作

黃鵠化白鳧朱鳳悲黃雀當年杜陵老身世殊寂寞我今亦何爲感嘆昔賢作斯須脫死地稻梁竟安託平時親舊書來若風送籜今如孤鳥沒遠影不可繳故人豈異情柰此道路惡天陽亦已轉梅柳漸舒萼獨此中野民何時返城郭

書憤

甲寅

憂國忘身見性情房公雖跌自高名年來忍淚過千斛何日秋墳一縱聲



宅東數十步有小阜名蟬墩舊多樹蟬集之故名

地以蟬墩著佳名惜已荒小邱無一畝夏木想千章咫尺吾家宅周遭野水塘兒童登陟便高試紙鳶翔

至清江楊至堂留寓節署

見卽開賓榻知君友意真殘生逗優渥高興撥悲辛意倦聊齊帙情忘任吐茵夢魂安幕府飄撼尙江津

悲張丙元吾友景堂子也

生名繼庚其姓張年少奇氣騰飛黃爲諸侯客游湖湘筆頭落紙天風長咸豐二年歸建康城破不死心膽強欲以翻城剪羆狼詭言進執酋首旁賊喜授以黃巾裝潛誘羽翼迴心腸汝夫攜婦汝還鄉相逢目動心深藏縋書大帥三報章會期斬關門朝陽將心躊躇士徬徨望門疑伏歸雁行城內氣絕失所望曠

日謀洩死可傷身雖糜爛舌不僵嗚呼此生真國殤

偶書

顏子爲大士丁寬易祖師名號固儒耳禮拜翻黃緇佛法初入中其徒固蚩蚩翻譯盛文士六朝始倡披刪摭九流言助彼雄誕資其言戲劇耳闕者無乃癡



近代詩鈔

莫友芝

友芝字子偲號邵亭晚號聃窆貴州獨山人道光辛卯  
舉人截取知縣有邵亭遺詩

石遺室詩話黔詩人鄭莫並稱均多亂離之作而子尹  
公車報罷後蠖屈鄉關飄泊西南子偲則晚交益陽撫  
部壽陽湘鄉兩相國踪跡在大江南北及見粵寇蕩平  
身世稍發舒於子尹子尹精經學小學子偲長於史地  
之學二人工力略相伯仲子尹詩情尤摯耳僅謂愁苦  
易好時當天寶者豈詩盡拾遺耶

陪黎雪樓

恂

丈過鄭子尹望山堂作上元和主人兼呈雪

老



經巢歲歲上元杯咫尺青田幾度來十里花光扶月轉萬山燈  
影踏星回齋鹽似爾真如蜜梨棗牽人定作災巢子尹方開雕經

近詩久對王忱思范寧喜隨佳節問刪裁同刻

### 圍城九日

城上風光無限愁但看千堞坐貔貅軍單仍怕凶門出賊益幾  
如落葉稠十日元戎期不至萬家懸釜漸無謀名園竹樹樵薪  
盡白酒黃花何暇求

### 贈唐鄂生

山店淹旬空寂寥草堂來趁故人邀蒼藤尚覆攤書榻古石仍  
通倚杖橋世路崎嶇逾昨日鄉愁歷亂劇今朝那堪更近重陽  
節風雨悽悽誦楚招巴陵吳南屏武陵楊性農

桐梓餘賊鄒神保等已窮蹙入水落洞復爲守者所縱

聚師環壓石門牢後舞前歌太自豪甕鼈竟能生羽翼釜魚誰  
使縱波濤龐勛虛幟還供米彭樂收金漫舉刀大鎮幾多通敵  
者知難小邑問牛毛

自省南往獨山道不通且一歲始得猶子遠猷來書知州  
人以社團自保城尙無恙卻寄示一百韻

遵桐昔未亂齋匪假妖術糾結異種人豐寧肆侵軼鎧花走愚  
蠢趨死不自悉其渠雖就殲同惡未盡極遂乘白錦纓還擾白

陽卒甲寅二月十七日獨山齋匪楊元保等亂豐寧上司三  
城元保餘黨余光裕等復我時在重圍涕泗念兄姪倉皇乏毛

羽敢信何土吉雄兵萃三省惡馬馳萬匹雷台走虔柳逐北數  
道出連郡驅風颯巨憝屬鈇鑕楊鳳以十二月十六日破走乙

司章一時反側子何者不股栗坐想乘勝師一鼓痛爬櫛指撫清

### 近代詩鈔

莫友芝



鬼教叱咤洗蠻猾譬之湯沐具何處留蟣蝨捷書馳爾叔謂指  
安江末方隨子通部橫戈更磨刷阿兄適南來共喜破憂憊家  
人兩無恙鄉亂庶可輟握機者誰子自誑不暇恤耳目忘腹心  
枝條昧根節朝防趣甲弛暮釁覩竿揭驚傳崖門陷旋報合州  
失乙卯六月三日上江凱棠等苗陷崖門釀成燎原患尙冀杯水滅  
南行歸路斷八番取回屈千峯低粵徼黯黹送落日滿道逢流  
亡老小互扶挈疋羸衣履破飢餓言語慄偶然風鶴警戰縮有  
餘慄荒荒紅崖河饒徒盡還蹶牙洲昨夜火生死介一髮迂遲  
免新恐返轡復何說半道得遮要草堂做修潔平生文字知忠  
憤待選述表章有賢嗣敘次敢辭拙翰林名父子羈羽息飛馱  
一巷呼可膺朝昏破愁疾廣文隔勞江踉鏘弃冠黻相逢尤意  
外自詫虎口脫人誇德星聚亦笑窮鳥聒干戈自滿地詩酒竟

累月浩歌惜劉三授命借蔣冽

劉芝山字伯龍潞浦人能手提

賊征粵匪積功盡以讓其族兄士哲得知府而芝山僅六品翎  
頂巡尉職不就率其部治鐵於南丹子尹與荔波令蔣嘉穀守  
入城時應募來助芝山亦不披靡死嘉穀字曉雲口口人深

請師人間關逾急切相將趨大府痛哭眼欲瞎稍知吾遠子失

業久投筆糾旅當北藩猛氣頗盪決危哉黃梁戰幾作灘頭血

桐刀仍兆亂北走顧我室無從助多算回望屢愁結十月餘中楊

子容等復起入門餘飢劬小女遽天札桐棺完遣嫁忍淚且作

達愁聞我行路妖黨轉滋孽豚湄指沉首橫互伺扁鑄延辰更

始間木耳又草竊壞城未一收弃乃過七八儒冠卽戎首詩禮

竟何物材官工遁逃文吏安用詰毅哉兩游戎鬪死更不怵楊

君吾保障愈令想屹嶮孝廉楊與蹇寸祿未干舌殉義同錚錚

士恥猶可雪後三脚壘失守者七月都江廳八月定且營十月



八思南游擊松桃楊廷柱石阡府正城大營其有以舉人楊超者定且梓游擊保齡  
有舉人蹇城得廷柱字保口檢果守八寨至是元保事起先至獨山  
籌守具州城無暫歸團練城破死於學宮辰舉人載取領吞當  
謁之夜撫軍令其暫歸團練城破死於學宮辰舉人載取領吞當

唇亡歎八寨我州愈餓晚連書戒持重飛夢遶嶢岳遲爾消息  
來重裘換單葛開函乍驚喜涕淚幾橫溢言從去年夏州境環  
賊窟州人爭敵愾奮發氣莫奪秋成皆入保官私稍充實宿飽  
使荷戈何銳不摧折所以一歲周崇墉尙完屹今年耕作計僅  
有二分一眼前縱無虞常恐到支絀矧自我里焚乙卯八月五日賊焚兔場  
全家寄城闕東南姑姊妹驚聚守飢渴遠也扞賊衝百戰苦力  
竭傷心四叔病遽此多難沒醫藥了不知喪葬從草率既死謝  
百憂生存盡旒綴北道猶未通呼援趣徵發勻都南鄰阡危久常  
恐更蹉跌波荔何當偕衆叔升斗相响沫暫爲太平民所願亦已

畢遠乎爾誠難世事非故轍我生既不早死地覓真活荆吳漫

耶穌滇雲肆回紇綠營卒已罄水衡費徒括驍材多掣抑駑帥

習喪蹶欲紆宵吁慮差賴巡社佗唐澤步兵山河子弟宋河朔巡社陝西湖北等處保甲

故令新使者行省概增設剛頭丁亂始柔氓與筋骨延北尋次

之其衆益勇傑邇雖遺小蠢肯使更延茁黔盜自如毛兩徼足

式遏天心苦厭亂勁選在此列老我習願領出處信天扞時危

右韜符戎經頗穿穴善師如轉環絲隙不受鏗吾家君顯公開

疆有前伐遠乎團子弟千銳慎一恭偏氛觸手靖羣逆好槍讎

繩武良在茲以慰老眼刮

聞都勻陷

經年辛苦扞孤城待到援師喜更生誰使病偏加小愈那堪功

近代詩鈔

莫友芝

四



竟敗垂成樓山繞郭飛燐影板水連宵送哭聲一樣捐軀新舊  
守天心人事兩難平

楊季涵駕部

彝珍

先後寄示亂定草兩刻及塔忠武行狀

即用集中坎字跡字兩韻答之

歲行當爛剝方卦習勞坎過暄遺肅殺惡植劇增感弧矢集匪

單豺狼饕益噉連城送灰燼返節何心膽

七月以來古州都勻清江台拱鎮遠黃平

清平等城相繼陷而去

節制者脫身而去 乾綱豈無提坤維已多撼高容鬼神惡怨

劇骨髓憊子遺幾黔黎何由出坑窞飄搖笳鼓際斷續藜羹糝

徘徊誰斧柯勃窣我牀毯瑞芝何文福福墨今再槩直辭挺高

竹大句陋柔茵藉非楚多材早使里氛淡倉黃猶集枯整暇焉

食攬勝算操侍郎皖鄂解愁慘

曾濂生

廉訪淬選鋒彭湖靖葭

茨

羅山

中丞去鐔無黠獠乃肆敢

胡詠芝林翼曾守黎平鎮遠剿平雷公山賊有威名

其去貴州苗乃肆

我欲借其一上乞天頤頷雷霆假新節撻伐更舊覽

摧堅理殘破斗郡肅提攬期君和饒歌一洗膏血黥

頻年經喪亂埽斷故人跡過日把君詩如聞喙三尺飄零悲大

樹痛哭寒雲白

君此韻詩有大樹風飄零枝捲寒雲白句為提督塔齊布公發也

平生憂時淚

對此那可抑東征今幾載所失常倍得垂堂服深戒持重工自

惜不有虓虎臣緣何救離析桓桓烏公部氣足盡祆賊江表馳

白袍刑天落干戚旌麾授子遠特達邁高適

全忠源與塔忠武烈忠源與塔忠武

絕特胡天不少愍次第成古昔比聞江左右援將擅奇畫殲渠

期旦晚決勝翻主客數子如不亡旌旗定增色愛君智亭狀生

氣猶壘壁大篇應日夥勤寄二三策強伴憶南屏飄零竟何役

歸方有遺響勿使墮兵革

巴陵吳廣文敏樹古文極有義法曾見之唐鄂生所

近代詩鈔

莫友芝

五



寄楊性農

我愛武陵楊駕部不稽車馬臥江湖道真源近花應好安遠洲  
存橘在無比歲風煙愁極目何時懷抱對傾壺邇來元室新詩  
卷又似楹芝長幾跗

憶廬詩爲章子和

永康

吉士作

虛檐納清輝衆妙赴窗戶晨昏一書叢至樂自太古仲米豈勿  
營萊嬉足相補琅琅商歌發舉眼生媚嫵空名驅遊子萬里去  
邦土科第入取攜風木轉惻楚蒼然大癡筆突兀見環堵摩挲  
餘屺望境適意彌苦我有青田廬亦傍延江滸松楸眼中在飢  
走不遑處三徑復奚爲春明忍羈旅憂端引披圖鬢變增幾許

呈壽陽相國乞篆書邵亭榜

有序

玉篇邑部邵力語切警縣亭名按警爲漢牂柯郡十七縣

之一其地當今遵義府及大定府之半至晉分警置平夷  
平夷當在大定而警專遵義道光時侍先君教授遵義己  
亥庚子間有府志之役於犍不狼諸山警黜延諸水竝鉤  
討粗就緒惟邵亭失收辛丑先君見背研食久僑不能歸  
乃邵亭自號以志過攷希馮書此部載專亭名無別義者  
凡十有二文其鄜郵鄜郿郿郿七文竝許君所有邵承  
警次邦前當與七文同本許書而二徐傳本逸之非邦後  
鄖鄖郿鄖四文比雖更乏他徵意補此篆當亦不謬於許  
氏

憶昔手圖遵播經漢警山川蒐且徧邵亭近在野王籍孰視睬  
睬乃無見飢驅廿載歸計迂延北飄蕭守孤硯遂因亭字署僑  
銜志過不遑何所衍流傳浪得耽古名郵邵

續漢志河東郡垣有邵亭注引博物



有記縣東九十里苦遭時俗眩時人多諷劬新奉壽陽編靜集

沈林取徵援何顏氏家訓勉學篇乃知亢仇舊是履劬亭屬上艾

此相國集隱然薪火導邊生識小問奇從究研坐思結構補前

蹤突兀眼中張巖甸檢文未信漏叔重副墨頗疑疏老鉉道循

平廣認西割華陽國志自焚道南義比鄜邦宜各擅維公引筆

契倉雅倔彊蛟鼉起東絹榜書乞取付犍山他日抵披南閣卷

九日定甫先生招陪壽陽相國集慈仁寺次壽陽韵同會

子懷侍郎楊湘芸林穎叔兩郎中孔繡山侍讀繡山

何必重陽定菊花散遊風味勝溫嘉亭林祠畔一尊凸穉子闕

邊雙樹斜老輩虛懷空坦率故鄉回首隔塵沙三危禹蹟勞徵

記愁憶千峯黑水涯談次及永寧州紅崖碑友芝以雲貴南北

採字蓋是二江禹蹟相國定甫詩竝

展重陽日獨遊慈仁寺登高騁望叢感無端壽陽定甫兩

公疊韵詩至因迴環顛倒次之得六首並呈兩公

遠峯隱映碧蓮花絕似南亭在永嘉忽憶謝池春草夢誰憐燕

市隻巾斜通天黑簪三秋霧落日荒江九派沙庭芝弟館威寧

處舊名烏權簪漢諺所謂盤羊烏權又是一年歸未得萍蓬相

望各天涯

一自樓船縱呂嘉漢廷幾費墨封斜金身不借供消劫佛籍常

添抵算沙江國才人偏意氣海天愁思渺津涯秋防歲漕無消

息苦逐天台晚桂花

白魚穿荇沼紋斜黃雀盤風擁旋沙蔥芥從來非異等鯤鵬何

必在天涯五升不糴官倉米十日還尋野徑花大士搢頤龍女

笑寺中奉齋變觀音搢頤書生饒舌有誰嘉

近代詩鈔

莫友芝

七



世路渾如一聚沙，竭來何處是顛涯。已嫌直竹生多節，安得喬松著好花。短後徑思隨李廣，長吟休更憶秦嘉。霜前無數蕭蕭柳，猶仗風光作態斜。

有涯生事逐無涯，消得春風幾度花。感寓何人識莊叟，拾遺漫爾笑王嘉。始知覆簣山能就，須趁高春日未斜。寺戒長老有戒行新寂曾於寺

後閣未就起 早向香嚴參頓義，樓臺彈指遍恆沙。

歲暮光陰未有涯，禦冬珠米竟量沙。寓中囊米為慰懷恰喜新

詩到引興仍隨去，鳥斜雷座傳杯從。率略捲簾看畫亦清嘉。歸路

逢王張叔平作畫 歸來無奈將弦月，秋影離離踏露花。

壽陽相國疊韻見答，獨遊詩竝為篆。邵亭榜依韻奉謝。

平泉不用自栽花，常覺秋容分外嘉。草堂小秀野花市下斜街相國楹聯句也所居四眼

井在下斜街近花市 脫手機衡供嘯傲，稱心藜杖任欹斜。傳詩已許參冰

柱引筆還教悟畫沙，垂老及門嗟已晚。飢驅愁絕又天涯。時將出都

宿獨樹寄芙衣

山山桂花黃，礪礪葦花白。一揜復一重，愁殺南歸客。

來路灣復灣，去路山復山。故鄉如在眼，行客幾時還。

抵鄂城尋柏容，飲次京師及故鄉。警報沓至

曲江宮殿竟成煙，同谷鷺鷥道路遄。逐客吞聲看北極，傍人繭

足向寒天北塘誰遣虛，屯戍黃屋何堪尚。播遷眼底楚軍江漢

似勤王急為赴幽燕

太湖行營雜詩

百里熙湖縣，殷繁自昔誇。誰言千帳外，不見一人家。客思牽桃

葉春心寄菜花，那堪憑日暮。城上聽悲笳。

收安慶凱歌獻湘鄉節帥兼致沅浦觀察。國荃士恆博士

近代詩鈔

莫友芝

八



貞幹兩介弟

臨淮號令肅清秋不動如山有定謀試看宜城新壁壘湘鄉羣  
季是營州

大雷港頭揚大旂長風沙觜合長圍憑招黠髮千羣入肯放狂  
毛一騎歸

湘鄉節相寫蘇辛大江東去千古江山長短句爲惠賦謝

昔以紈扇乞書亦  
今竝至故有結句

摧敵渾如翰墨場伏波橫海見湘鄉笑談早已收廬皖草竊寧  
容老建康古調銅琶飛激越高秋盾墨恣軒昂野人心跡同捐  
扇東下猶堪一奉揚

湘鄉相公命刊唐寫本說文殘帙箋異且許爲題詩歌以  
呈謝

黠侯贈我唐人寫本書乃是許君說文之斷帙中唐妙墨無雙  
經動色傳看叫神物本朝樸學一叔重六籍盡起基乾隆錯殘  
鉉疏競拾補勤矣區區諸老翁唯唐明字科課試必先通一代  
義疏家取攜若殮饗少溫謬悠在斥廢說之碎掇還網籠爾時  
此本若到眼定詔鴻都捐蔡邕汴京祕藏盡六紙紙縫增銜紹  
興璽自從寶慶落人間幾閱劫灰換朝市百八十篆歸尙完界  
宅分曹爛仍理顛預只作書畫傳千載何人究端委邵亭嬾頽  
藥不悛奇文入手如笞鞭燈昏力疾草箋記整亂鈎沈坐無寐  
湘鄉相公治經如治兵號令罷茶齟齬皆晴嶸莫府軍間結習  
在刊徐左許時鏗鏗謂余此卷雖晚出試數四部官私誰第一  
元鈔宋刻總奴隸爲子性命耽書報良值子箋好成爲子歌中  
有大義數十不可磨卽呼鐫木印萬本把似海內學者豈在多



感公盛意惜晚莫悠悠志業餘兩蟠無聞守此當如何

湘鄉爵相惠題唐寫本說文卷子次韻奉答

禮薦菁茆芹落笱

笱用音

貌羸羽鱗含樂本野蟲毛菜豈自奇現

琢乃登朝祭時世間何物有定珍升沈顯晦聽中人李唐破卷  
浚長字斷零黯黹失精神湘鄉相公見咤絕尤物不許巾箱巾  
刊傳學人重題詠千載一遇驚昌辰相公昨日平江南荆揚薄  
海靖煙塵定推此意向幽側拂拭頓使周行新中興求闕及此  
補相業武功同絕倫凡將說注豈公事要勵賤子加勤斷賤子  
卅年坐坦率不信今輿非古輪表書常覬著作式江式試吏竟忘  
陽羨循賀循把公大句發雄快如飲天漿豁心疥坐思巢經鄭小  
尹安得西來奪苗蠹公命鄭子尹書提倉酌雅佐軍饒懷抱鏗訇向  
公盡從公且及飲至酒小技雕蟲愧無有剡山紀績護儲槍引

筆猶堪韋仲將



近代詩鈔

苗夔

夔字仙麓直隸肅寧人道光辛卯優貢生

讀段氏說文解字注寄祁春浦相國

生平私淑心亭林多纂輯韻學接孔周洪洞李子德語也亭林

淮安張力臣校寫穎川陳上季劾之一語亮能執世無揚子雲

鬼笑倉頡泣天未喪斯文浚長漢許君曾為浚令本書水部浚

也秦灰拾南唐徐楚金繫傳成四十汪刻落葉多破碎不完葺

每部少字每字少說解者不計其數段茂影宋聞顧黃藏之等

什襲何當一借來萬拜與千捐補天同媧皇動地笑驚蟄九泉

誰修文此舉登幾級神爽秋毫巔主賓閬風立



近代詩鈔

邵懿辰

懿辰字位西浙江仁和人道光辛卯舉人官刑部員外郎軍機章京在籍殉難有半巖廬遺集

過黃子壽適涼書畫滿壁賦呈賢尊考功

古人之心不可尋颯然秋風一室深還留古人精爽在鸞飄鳳泊紛來臨君家丈人愛書畫料簡不使蟲埃侵中庭暴畏風日損懸之素壁高堂陰海王村中走僕僕君從而後遊書林各投所好望門入此時父子忽異心米老菟奇有古癖王充入市惟書淫歸來堆疊滿篋几論價不惜酬兼金俸錢到手便傾付清茶展對喜溢襟君之蓄書求有字紙板不辨古與今未若丈人精品日縑素甲乙排森森朱絲鐵石不遺恩九原喚起欣知音



夜闌直恐虹貫月四邊金薤垂琅琳臥游倘欲衆山響中坐一  
鼓龍脣琴

喜聞少鶴病已

君在窮途慶更生丈夫未死要崢嶸膝攀市上還談相足斷車  
中尙用兵況復走同黃犢健何須歸踐白鷗盟便應西向長安  
道春水江船盡室行

孫芝房蒼筤谷圖

君胡繫思蒼筤谷君今身寄金馬門得時雷動不遑息九華殿  
上重蒙恩五溪歸來納使節殺青掌錄勞朝昏湖南接天暗篁  
竹萬古草綠瀟湘翻君非其時歸豈得中谷漫指桃花源青鞋  
黃帽野人具白雲翠篠山凹村君曰童時所游釣側耳清夜聞  
啼猿出山幾何神弗王有如澤雉投籠樊昨者西風動衫袖夢

到茅屋蒼厓根長鏡凌虛劇僊藥短紙曲折開秋原玉堂不見  
郭熙畫時復對此蘇心魂

彭餓夫墓

人生百年甘蔗渣鐘鼓饌玉風中花條侯主父要同盡首陽清  
風生蕨芽慙依故人共脫粟伯夷所樹天所祿仁者之粟不可  
常我獨何爲害口腹嘯臺激嘯高雲天神遊清都飽紫煙行人  
空挾一車飯下馬孤墳二百年

贈前制府周敬修先生

堂上磔人如磔鼠穎川大姓粟在股威名萬里邳都鷹拱手對  
賓色响响盡尸溲惡作屠伯不侮孤惇稱衆父令淵徙鱷江渡  
虎墨吏望風自引去只今行年七十六白髯飄蕭瞳正綠召來  
金殿伏青蒲愛國有懷傾不足上書慷慨策平邊一心推服林



公賢天其福我厭此虜不見瑞麥在野雷誅祆嗚呼安得公及  
林公守圻甸方州得人士選練折衝六合有精神坐困鱸鯢可  
無戰

近代詩鈔

陳慶鏞

慶鏞字頌南福建晉江人道光壬辰進士官至工科給  
事中有籀經堂集

題朱茱堂鐘鼎款識遺稿全用六語韻

爲其名嗣善旂屬

茱堂古君子日邀傾相與邀持夔鼓文公爲析鼯鼠邀問黃鐘  
律公爲定絜黍所契在金石論說無齟齬導山導昆侖導水導  
漢汝置身象教前字字鈎微緒辨鼎首辨憂蛟篆力爲杼瑀戈  
結句曲牙聲齒亦齷齪商彝尙簡約丁癸亾父舉虎占當提梁雞  
單飾曰鉅文作科斗形尾細腹則巨由倉而及籀獵碣柳貫鱗  
字孳寤加益繁縛得配所槃設亦轆轤剖析紛如紵象形釋亞  
若諧聲說榼醴會意韻二百釁眉轉注語指而知其事揆揄訓



春杵假借門最多若蕤若蘧莒離父从鳥旁梢妃本非柘啟鼎  
桌乃衡鉅匿樵卽稽同聲相爲用伯女爲帛女一字或數假爰  
旅旅通旅留心辨名物甌齊黜屬楚寔甌無底甌經鐘乃有鑠  
下泉秦漢器錯剝兼尊俎滌槃謂之類雁鐙用然苴晉尺度慮  
僥漢斛數秉筥刀鏡亦有文繆篆雜紛處下網得珊瑚采藍具  
曲簾徵引羅羣書雀守謹遵許擘精罔遺力訓詁出心杼從以  
篆文釋乃合古籀叙叩首問沮誦鈎稽無違拒爰禮徵漢廷說  
字來禁禦集古搜歐陽剖錄洪趙呂近稱吳侃叔握粟出問駝  
大哉儀徵師衛道作柱礎巖巖泰嶽尊宮作咀與岨灑灑渤澥  
流水匯蠡與澹大廈張帟幪龍龔錯鱗虛會稽來竹箭楚材集  
杞樸公館席西賓密如蟹與駟公子來受學酌醴釀黑柘洪鐘  
撞之廷合止有祝啟參訂公成書擇善無細鉅解亞爲兩弓碣

然定奪予奇文釋安康方語辨粒糗十九依公言間亦採衆侶  
公出觀樞政蠹沒力不慮獬豸立烏臺執笏近清籞洞悉民生  
隱獻疏納當宁嚮用日以隆內葬外封圉三輔闢黃圖庭清息  
囹圄蔽芾留甘棠嘉禾界生穰飛芻督漕粟天庾富廩糈河流  
亦順軌舟行無間沮偉哉經濟才帝用作心膂佩玉鳴瑯璅金  
紫簇衙衙仕與學兼優勵志策修阻胡爲痿痺加困頓長抱瘋  
老學猶孜孜執卷手不去士仰子雲亭問字酒有萸帷幄來春  
風躡屩樂懇懇公篆循熹斯公楷學薛褚畫品亦森逸精神著  
墨楮索畫與索書門外履納苴庭來道士鵝俎獻博士矜手澤  
家猶存產抵萬金貯阿童不識字糝雜入籠篋倘不遇知音祖  
龍噉一炬有子抱彝器珍等清芬茹什襲藏之篋百年經墨煑  
其中亦塗鴉拾起益惶怛間夾參詩筒嵯峨勢若崕浸淫入晉



魏英含復華咀想當落墨時奮猛巷洪淑研露散珠玉花壓讀  
書嶼憶邀初見公公起俟堂著彈指一瞬息穉癯十寒暑維時  
丙午憂遂初賦桑苧來裝當戒塗料理作行旅公子抱書來爲  
屬弁之序展玩不能釋且行復且阻蒹葭猶蒼蒼伊人宛在渚  
此卷成英年其才博以謂是非頗不謬毋鑿柳與柅踏駁業已  
祛點竄其庸詎卷帙亦浩博字堅力則紆銳意負大山當無笑  
蝟螭願以函琳瑯金薤浣露滑不乃藏葫蘆讀下飲醇醕盍早  
登梨棗莫作延以佇堂蔭今依依鋤經築有墅

初八日次南旺分水紀事

地有禹王廟龍王廟宋公祠

南旺水脈通地肺禮稱大野澤所會憶禹距川濬畎澮東原底  
平紀其巒其水發源自泰岱七十二泉下澎湃地勢突起高而  
邁豐流若門兩山介於鞠爲外芮爲內水草交湄激砰磕自陘

之出口象兌分別於八廝二派北會衛漳達燕塞南入沛淮泗  
一帶會看貢道禹跡在浮汶達濟舟所屆年深潼激故道壞徒  
駭馬頰數爲害吁嗟宋公來相暎節秉司空作鼎鼐尋源直探  
蔥嶺外疏濬導河築以埭上引萊汶村之戴下審尾閭縣之沛  
蜀湖馬踏納灌溉茫茫巨浸兩相對洩水瀦水司其隘斗見萬  
艘芻飛蓋金支葆羽來旆艾咨詢白老厥功賴載翁其河祀典  
載我昨泊舟候湍瀨槳以木蘭楫以檜秋汛其遲水其退津淺  
只可砵揭代舟人幾如枯魚曬忽聞窗外叫叢蒼紛紛鼓柁促  
行旆水勢陡起力高大疑是河伯噴沆瀣屏門不截船不礙順  
流飛駛輕如芥一轉瞥見蜀山黛河伯河伯我其拜

十一月廿八日抵家戲作有客有客四章

有客有客自都來閱盡山隈與水隈於漢案戶始就道歸來已



報梅花開

有客有客挂冠來廿載京師故我回寒蟬不鳴凍霜雪同里又呼御史臺

有客有客絜家來孺子依依共徘徊長少相見不相識欲語猶作半响猜

有客有客載書來竹林繁露兼玉杯家無長物只此數時還我讀亦快哉

題苗仙麓張石州何子貞邨谷論心圖

歲寒有三友曰楫曰竹榕一老曳杖坐歸然今苗興韻補與火

馬融笛賦曲終闕盡餘弦而更繁手累發密節疊重

韻漢書敘傳子夫既興扇而不終鉤弋憂傷孝昭以登太元維

何苗與我曩如蟹視蛩曷不數及我毋乃太不公論心論何事

但見身躬躬張君亦云逝無復訂豹駘石州巴歸道山苗燕而何蜀參

商成西東仙麓仍在京子若問優曇樹一齊貢珠宮三人皆辛

苗仙麓寒鐙訂均圖五古百韻

倉頡船六書易古結繩治其一曰象聲相成得取譬兩體合一

體別於形與事半義半主聲時或兼會意轉注非形聲何以比

其誼假借非形聲何以得其字后夔命典樂一闡天地闕虞廷

來賡歌喜起詩言志墓豐鑄齊豔奈吟銘厥器吟訇古籀分於

文觀禾穗合觀三百篇閭里通諷肆乃自古樂湮斯道如沈醉

流風遞相承民俗日叨蠶忽來唐神珙叛法攝十二見溪眩澄

泥簧鼓滋益熾呂靜作韻集李登敍聲類先珙書云亡無從別

軒輕幸有梁沈約四聲定厥位法律抗鮑顏才藻空儀虞當時

無韻書以此為祖鼻可惜陸灋言分羸轉襍厠我輩定則定毋



乃騁私智宋祁暨丁度增益漸加敍岐中復有岐舍梧而養楓  
卓哉吳才老逕拔文壇幟通叶古轉音一醒如呼寐吾宗明季  
立慨然獨攬轡吉甫奚斯篇取與屈音坐然是與非黍半鸞半  
鷹鷺直至甯人叟博學而多識十部別厥居康莊騁騏驥江戴  
段孔姚分配益密緻皋文創齟聲獨得許書粹聯系各相從錦  
纂羅文織先敍以正聲省聲亦聲寄李翱孫恂輩當已退舍避  
况乃問截箏直到嶰谷邃探麤籥之韶歌樂取二律肆同黃鐘爲  
權輿彙黍平如錘鳳皇調七鈞爲數適相值清廟留遺音閔宮  
美有恤叶去聲葛天操牛尾皇娥彈古瑟韻若五聲加二變詩樂  
豈或異聲訂編既成鷄林價爭勩奚何無殊科戈麻亦連騎戩  
從弁得聲奇語闢巢燧陳蔡識不羹六遂本六術斯醜爲麗雜  
圭饒爲蠲糈細讀徐邈說禮記立容德韻若古文或今文子春

正其義長言并短言公羊發其祕莫訝狸爲來乃知字者孳去讀

聲取擗漢魏音讀若凡讀爲叶去聲耿耿寒鐙前奇癖專所嗜

書辨蝌蚪彝器分虎雉于以考龍鐘于以觀鹿甄于以析夔鼓  
于以審雞舩禹鼎及湯盤爰文載旗旆建首定字讀執戈握厥  
秘可令尉律習可作學僮試之焉測本旨紂紅詔辟呬近復訂  
葩經篇什錯鱗萃療癩聲之轉太傳說衡泌魯詩繡作綃齊詩  
閉通鞮仇述亦互文貫宦祇一致參訂四家言證說商與賜几  
茲異音者悉殛而爲齧劓剛爭先覩景星我以遲苗興漢經生  
先業緒未墜當其說生民稷離證奇瑞傳薪今有人便便孝先  
笥置身象教初笙簧作鼓吹說字未央廷爰禮兼奏近叶問篆  
斯與邕審音曠與摯治禮祖高堂治易祖馭臂治詩祖申轅治  
書祖橋庇太常何移讓左癖作寢饋齊學胡母生魯學尹更始



聲叶去講貫通古今無慮語言譯桓榮貢太學安車迎以韞明根

來田間牲牢饗以載君昔遊吳魯沿淮而及泗黃羊延之賓隨

淳甫氏春秋注藻視學字江蘇呂偉伯聘校議隨馮展雲譽馮勤字偉伯山日

來寓都下奇書發金匱館樹巢孔鸞錦翼聯文翅先盍契所先

一見歡倒屣爲我說形聲口出若不啻治聲如治絲煮繭加蠶

槌治聲如治田審端辨徑遂治聲如治兵樹壘張矛鏃治聲如

治麻置朔定分至我滌洽州鳩祇以七音備七政天之衡珠斗

獨建柶七音人之籟桴籥通葦蕒綜二百六部一掃歸簡易狂

瀾迴既倒羲戈挽日駟獨來復獨往朝燕而暮冀出入毛公里

垣墉塗茨墜中有獻王書耕種資深漢耕書概劉章傳嗇神更養

和迄今靈光歸聲叶去

近代詩鈔

溫訓

字伊初廣東長樂人道光壬辰舉人有梧溪石室詩鈔

黃泥壠舟中望月

高峰入月色天半爛如銀峽仄光難到宵深見益親輪鏡孤石

破影亂怒濤皴一嶂橫舟黑隨鷹莽攫人

白侯舟中卽事

蒼山夾岸送行舟河柳垂陰蔭一湫百種芳心歸碧草五更殘

夢墮春流年荒久已摧吟興路遠無端動旅愁聽到鷓鴣惆悵

甚南飛何日抵瀛洲



近代詩鈔

左宗棠

宗棠字季高湖南湘陰人道光壬辰舉人官至東閣大學士薨謚文襄有左文襄集

石遺室詩話文襄詩有扶風豪士之氣所存極不多

辛卯夏仲兄客武昌送別後卻寄

西風吹孤禽瘁羽身不肥人生奔車中志士無光輝憶昨別兄時盍旦鳴朝暉念當遠焉去有淚不敢揮開懷相慰語蹙蹙恐君悲攜手上河梁去矣何時歸別君未市旬巨浸城四圍瑣冥麾黑幟闖浪堆頗黎日月澹無色蛟龍專其威哀哉澤國民倏忽阡廬非傳聞鄂渚間井竈嬉魚龜念君不得往如飛鳥黏繭嗟予少嗇祜孤露唯君依三年客邵陵相見時亦稀貧居豈能



久誰復惜分離華顏苟無凋白首終可期塵衣纔一洗忽復載  
行旗江湖阻修遠我懷君豈知蛟龍勿君碁蝮蝎毋君危一家  
盡死喪君我先人遺念茲并百憂泣涕以漣洏晨之西肆卜默  
禱煩靈著遂遇離之九卜士詳其詞積陰臨陽曦陰險陽則夷  
行者遇此兆上吉莫如之憂思積中腸欲信旋復疑歸爲阿嫂  
說征途亮無羈阿喜蹠踏來強索紙背窺鬱鬱低自語對此增  
感歎湘水去悠悠大別山巍巍顏色不可睹况復音書希故山  
有黃精野澗多蕨薇何當早歸來與君共耨耰

題孫芝房蒼筤谷圖

湘山宜竹天下知小者蒼筤尤繁滋凍雷破地錐倒卓千山萬  
山唬子規子規聲裏羈愁偪有客長安歸不得北風吹夢落瀟  
湘曉侍金閨淚霑臆畫師相從詢鄉里爲割湘雲入湘紙眼中

突兀見家山數間老屋參差是頻年兵氣纏湖湘杳杳郊坰驅  
豺狼避地愁無好林壑桃源之說誠荒唐還君茲圖三歎咨一  
言告君君勿嗤楚人健鬥賊所憚義與天下同安危會縛湘筠  
作大帚一掃區宇淨氛垢歸來共枕滄江眠臥看寒雲歸谷口

壬戌九日軍次龍邱作

萬山秋氣赴重陽破屋頽垣闢戰場塵劫難消三戶憾高歌聊  
發少年狂五更畫角聲催曉一夜西風鬢欲霜笑語黃花吾負  
汝荒畦數朵爲誰忙

崇安道中和同征諸子用原韻

直從甌海指黃河萬里行程枕席過道出中原宸極近瞻寒西  
賊楚聲多尖义鬥韻看題壁競病聯吟更荷戈回首四年泥爪  
迹明當出嶠意如何



百二舊關河郵程次第過捫碑知字少懷古覺詩多殺賊仍書  
檄降羌任倒戈安危仗公等於意定云何

秋日泛舟泉湖作

我心如白雲舒卷無定著身世亦如此得泊我且泊昔歲來蘭  
州隨槎想碧落黃河橫節園牛女看約略以槎名其亭南對澄  
清閣走筆題一繫鄉心慰寂寞今我訪酒泉異境重湖拓杖藜  
出新泉隄周三里廓洲渚妙迴環樹石紛相錯渺渺洞庭波宛  
連湘與鄂扁舟恣往還勝躡游行屨邦人詫創見旁睨喜且愕  
吾黨二三子時復舉杯杓頻年南風競靖內先戎索出關指疏  
勒師行風掃籜強鄰壁上觀弭伏一邱貉老我且婆婆勉司北  
門鑰桓桓夫子力盛美吾敢掠西顧幸無它吾歸事錢罇水國  
足魚稻筍蕨耐咀嚼梓洞暨柳莊况舊有邱壑一觴醉飛仙有

酒盈陂灤不飲酒不溢十日飲不涸仙來笛悠揚我來歌且嘯  
豐年醉人多仙我共此樂他年儻重逢一笑仍夙諾

題羅忠節公遺象

紫光畫閣且遲開競羨長沙好秀才省識舊遊如昨日春風歸

詠定王臺

咸豐初郭定王公館賀耦耕尚書里第及門諸子假館長沙東郭定王臺就公請業時李公續宜王公鏊李公杏

春成在余嘗與劉公蓉晤公於此



近代詩鈔

符兆綸

字雪樵江西宜黃縣人道光壬辰舉人官福建知縣著有夢梨雲館詩鈔

南臺雨望

獨酌不成醉寒花生佩刀登臺攬橫海終古鬱奔濤黯黯歌樓換蕭蕭戰艦高尋思塵世事天地一何勞

近代詩鈔

符兆綸

一



近代詩鈔

顧淳慶

淳慶字古生浙江會稽人道光壬辰舉人官陝西潼關

廳同知有鶴巢詩存

丁亥上元同芮羅兩茂才游赤城過五百人墓

田橫客也

田橫不作東海竭五百人墓乃獨存生五百人死同穴峩峩俠骨鞏厚坤至今歸然赤城下僉云毅魄非冤魂天台北望足蘭若西來豔說桃花源徒令名山讓仙佛瀑流憤怒猶崩奔春城燈火張上元萬家簫鼓聲朝昏同人選勝亦避俗指數陳迹爲我言玉京洞天事失實霞起建標安足論奇蹤惟有島下古舍生取義逾弟昆墓前祠宇喜新飾升階再拜酬空樽丈夫志事問何在獨五百人古誼敦



近代詩鈔

姚燮

字梅伯一字復莊浙江鎮海人道光甲午舉人有大梅山館集

南轅雜詠

崇封昔將相今爲居者田子孫已阜隸表字猶如椽樵斧及松  
枯涼蔭愁夜鷓其下禾芄芄風色故相妍松枯無根株禾葉過  
人肩盛衰視氣化安問愚與賢

同行一莊叟年已七十強老眼熟狐鬼寸腑鬱雨霜一年兩南  
北鴻飛偕迴翔謂無賢子孫朽骨任異鄉相憐一杯酒醉嘯聲  
激昂北斗在檐近照見鬚眉蒼

二鼓黃壘堡三鼓香城村旋風颭輪角沙葉爲蔽昏大河莽東



注石牖西營屯奔蹶不受役縱性投汙渾巡卒互譏盜擊柝催  
閉門巷火漸稀滅防肅及犬豚居常慎動止一息堪自捫麟虎  
各山藪於我何仇恩

仰面月如水一瀉千里明照君樓上頭照我沙中行樓高一眼  
望莽莽山川橫不愁阻汝目但愁阻汝情汝夢儻能來吾夢茲  
伶仃北爲樂陵縣南爲交河城

朔風送征馬飄瞥來鄆州攬衣愜朝爽縱目城南樓白雲在梁  
父零亂不可收海烟動雲隙岳上青浮浮汴京岬西控誰云風  
馬牛天門劃徐泗指顧通南郵梁唐割其險乃弱東諸侯悲歌  
弔台輔利病今誰籌

近代詩鈔

姚椿

字春木江蘇婁縣人有通藝閣詩錄

牛口

潛淵拔深蛟起挾亂石走疾風掉尾去留此與水鬪巉巖憑餘  
威奪路絕奔湊舟行緣而升若以口承雷濤頭倏噴涌漩極不  
敢逗一朝後出灘名出泉險右眼困用耳濟足踣將手救縱有  
萬夫力不敵一放溜夜聽洶波聲雷霆出衣袖

寬川鋪

遙遙炊煙高歷歷樹影亂湯湯清流激浩浩白石粲天開晴光  
多馬喜足力健人於登頓久軒豁得平衍沃野成都饒山郵漢  
中半兩峯各千里中置此驛便幾載蜀師屯行行前指沔

近代詩鈔

姚椿

一



極樂寺看荷

疎疎紅紅靜白白世界清涼藏古色夜深風露送香來秋夢江南歸不得波明更弄空外影雨過方知定中力古來何語品花工文殊不語維摩默

客中除夕

僕夫解轡馬停驂我亦征塵倦拂衣萬事無成閒處老一年將盡夢中歸成都春酒愁添暈劍外江山舊合圍猶勝曩時戎馬客滿天風雪望庭闈

近代詩鈔

朱琦

字伯韓一字濂甫廣西臨桂人道光乙未進士由翰林改官御史候選道有來鶴山房詩稿

梅曾亮云學韓而自開異境其下筆老重乃天稟所獨得樂府及五七古視近體尤勝其中長篇雄深峻邁如百金駿馬驀波注澗絕不蹉跌此古人成體之詩今人豈復有此

詠古

時俗競豪宕澹語每不喜栗里寂無人蘇州乃繼起卽事樂名教孤賞滌塵滓林樾蕩秋綠迴塘泛春水郡閣時無事羣彥盛文史風雨海上來燕寢抱深恥晷言歸西齋養疴臥田里百年



老且壽陶然味茲理

我家榕城西畛壤接柳州柳州昔謫此羅池懷舊遊蠻荒地苦  
瘠子女聲呻嘍質錢沒奴婢獠俗變澆偷蛟龍屈冉溪雲雨興  
遐陬豈惟雄文章政事一何憂獨惜少年時銳進昧始謀三復  
孟容書才人爲涕流

宋詩從韓出歐梅頗深造荆公獨峭折硬語自陵蹕詩教根性  
情觀人殊靜躁湖陰坐吟賞于我亦私好文字豈能廢經世未  
知要兵論無一諧畫虎微含誚禹稷讀何書望古發悲嘯  
涪翁內外篇銳意藥甜熟明月作寒鑑高詠齊玉局江梅證氣  
味演雅寓感觸平生奉母心友愛性敦篤作堂名怡偲結寮傍  
槁木西風吹熨道淚灑古藤綠憂國挺大節如公信不俗  
晦菴昔論詩南渡首放翁萬樹寒梅花團扇誇吳中壯年志功

業邊雪掣朔風中原誤和議仗劍思從戎斗酒換西涼一笑千  
觴空南園偶作記規諷何從容淒涼綿州詩異代符孤忠

酬馮魯川比部

魯川眉宇清而修坐擁圖史日校讐近來詩思愈涌出妙語一  
一如探喉我昔識子自余君謂子年少兼能文九衢人海勞問  
訊同巷咫尺不相聞余君大笑爲我說爾我結鄰已一月牆頭  
老樹蔭數畝門外長者少車轍風高葉落秋氣清披衣徑往坐  
石枰酌酒花前競談笑叩門時時聞棋聲我近移居愁寂處子  
亦簿書困旁午壁上詩篇久塵積惆悵隔年不和汝去秋一日  
恆數見於今日稀一面不是趨直無閒暇我自閉門疎懶慣  
聞君近寫陰符經毫端倔強蛟龍形乘興一揮數紙盡牀頭醉  
倒雙玉瓶昨往乞書君夜歸似云良會已有期市上黃羊正肥



美十千沽酒莫復疑

答蔣元峰比部兼懷彭子穆

時比部奉命至豫隨王相國勘河

蔣侯寄我中州書使我一讀聲淚俱大河以南成沮洳橫流東  
徙故道淤奔流直下洪澤湖洶濤日夜撼汴都千家萬家泣鳴  
鳴男奔婦逐牽其孥踉蹌避水城東隅城西積水一丈餘死者  
橫陳委路衢問誰致此民何辜頗聞河臣計錙銖歲額裁減昧  
遠圖汎兵咄咄鼓嚙胡黑風捲雨飢蛟趨齧桑蕩析連淮徐危  
城兩月幸無虞天使馳至民其蘇閩江一老多訐謨

謂少穆相先生

度水勢煩鑿疏楫石沈壁拳芟芻君爲擘畫焦髮膚我友彭宣  
今在無梁園作客顛誰扶哀鴻落日紛叫呼側身南望心鬱紆

王剛節公家傳書後

皇帝廿一載逆夷寇邊陲定海城再陷三總兵死之其一鄭國

鴻其一葛雲飛公死尤慘烈寸磔無完尸親軍數十騎鏖戰同  
燼灰先是裕制軍仗鉞往誓師余督爲犄角三鎮受指揮要害  
議分守險難安敢辭甬東僻海陬鋒刃苦新羅流亡招未復怪  
鴟嘯蒿藜荒郭背崖砦曉峰何嶽崎竹山障其南仄徑窮煙霏  
兵法忌阻隘技擊無所施峨峨九安門獨力誰能支公率壽州  
兵帳下多健兒列柵據峰均彼虜潛來窺我兵壁壘堅無從抵  
其熾賊退攻竹山巨礮轟奔雷乘勢破曉峰城角忽崩摧公迺  
急赴援事已不可爲鄭帥斷右臂裹創強撐搢張目猶呼公陽  
陽如平時葛陷賊陣間血肉膏塗泥或云沒入海舉火欲設奇  
一酋自後至剗刃裂其臍惟時海色昏頽雲壓荒陂公棄所乘  
馬短兵奮突圍前隊旣淪亡後隊勢漸危相持已七日援兵無  
一來公死復何憾公名日星垂昔年戰渾河奮搥鞭羌夷平猺



盪苗疆奪螯居前麾鯨鯢坐可屠何論鼠與狸命將惜非人錯  
置乖機宜傳聞祭燾日公潛語所私吾已辦一死此行必不歸  
大帥奔寧波招寶旋傾頽同一委溝瀆可憐損國威颶風吹怒  
濤沿海半瘡痍老弱僵道旁婦孺走且唬稍喜劉中丞鎮定安  
遺黎用兵今兩年我皇日嗟咨既苦經費絀又虞民力疲專闡  
成空名文吏習罔欺寇至軍已逃兵多餉空糜頗聞陳將軍戰  
歿江之湄歸元面如生大名與公齊世論泥成敗事後多詆譏  
若公等數輩使建大將旗進可殲凶鋒退必堅藩籬何必貽隱  
憂歲幣爲羈縻國家重武略忠義懷前徽死事例議卹優典極  
寵綏諡公以剛節祀公有專祠公名曰錫朋傳者宣城梅我爲  
補所遺長歌告予悲

老兵歎

金門已偪廈門失老兵歎息爲我說借問老兵汝何來道路飛  
書連兩月公家程期不得緩兩腳皸瘃皮肉裂老兵患苦何足  
陳我家主帥孤大恩廈門屯戍兵有萬况有鎖鑰連金門當時  
烽埃眼親見主帥逃歸竟不戰獨有把總人姓林廣額大額又  
多鬚自稱漳州好男子當關一呼百鬼瘖可惜衆寡太不敵一  
矢洞胸腸突出轉戰轉厲刀盡折寸鬻至死罵不絕嗟哉漳州  
好男子安得防邊將軍盡如此與爾同生復同死

朱副將戰歿他鎮兵遂潰詩以哀之

將軍名桂其姓朱膽大如斗腰圍粗願縛降王笞鮫奴臨陣獨  
騎生馬駒寧波三鎮新失利大帥倉皇欲走避公橫一矛踞帳  
前此輩跳踉那足畏我有勁軍人五百自當一隊往殺賊大兒  
善射身七尺小兒英英虎頭額紅毛叫嘯總戎走峩峩舟山棄



不守鎗急弓折萬人呼裹瘡再戰血模糊公拔鞞刀自刺死大  
兒相繼斃一矢小者創甚臥草中賊斫不死留孤忠是時我兵  
鳥獸散月黑漫漫天不旦中丞下令斷江臯亂兵隔江不敢逃  
敢有渡者腥吾刀

春星閣小聚數日留詩志別

策杖頻登眺乾坤復此亭煙迷三楚白山對九疑青別業東風  
起高松北牖聽隔年詩補和留客雨冥冥

憶昔一首將至浯溪作

十載湘鄉別後思孝廉船記北來時布帆盡攬巴陵勝雲海難  
忘嶽麓奇白髮漸多慚對鏡青山看慣轉無詩意中尙有浯溪  
好且往扶藜再讀碑

秋末聞舍弟南旋消息

我始還鄉汝在京秋深聞汝又南行獨遊每恨無朋輩投老相  
親祇弟兄最憶對床聽雨夜不堪吹角到天明連歲寇警迢遙南北  
七千里細數山程與水程

晨起對酒

湖口連朝避石尤侵晨五兩送輕舟好風不用一錢買狂客何  
知萬古愁飲量頓增傾綠螳曉煙漸煖起沙鷗榜人笑索迎神  
曲丹荔黃蕉拜柳侯

論詩

韓生畫馬真如馬永叔學韓不襲韓面目各存神理得驚人猶  
易愜心難

漢庭老吏當參取宋史遺編肯博收既說蘇黃詩已盡如何滄  
海又橫流



近代詩鈔

魯一同

字通甫一字蘭岑江蘇山陽人道光乙未舉人著有通父詩錄

題徐子容溪山垂釣長卷

南宗平遠窮纖穠北宗莽蒼堆高空營邱華源不復作江山萬古誰清雄國初蕭生聲隆隆近來獨數徐髯工髯也十二棄雕蟲十五十六遠從戎南極沉黎西甘松寶刀殺賊不快意一官手版今龍鍾雁門馬邑連雲中翁昔佐郡驂花驄蔚州官舍簿領少但滄山綠扶孤筇日斜吏散坐小閣千山萬水來心胸吳縑百端墨百挺突兀四壁生華嵩三年歸臥建陵月倏忽騎馬摩蒼穹幽州四月天多風九門翠幟驕游龍宣南小邸日扃鐸



冰盤堆案櫻桃紅我來窺戶正磅礴十指幻出千芙蓉今之二  
圖尤慘澹其一似仿山樵翁溪山垂釣大不易扁舟忽送江流  
東四十年來鳥過目卻憶快馬彎長弓狐關雪嶺幾萬里晚看  
鏡水磨青銅思君不見愁孤桐片帆欲動蛟龍宮梅梁禹穴今  
何在渺渺青山一去鴻

明月

明月非春水如何滿地流離離出海嶠益益注金溝花露時翻  
鵲風江有去舟多愁拚看汝扶影傍南樓



